



Dithuto mo

**EFANGELENG
YA GA
MAREKO**


KAROLO YA 1

EFANGELENG

YA GA

MAREKO

KAROLO YA 1



ISBN 0 86883 025 9

Bible Way International Correspondence Schools

MASTAPRINT - 00238

THULANGANYO YA TSE DI MO-TENG

THUTO	TSEBE
Dikitsiso Ka Kakaretso Le Ditaelo _____	4
1. Ketapele ya Mafoko a a Molemo a ga Mareko _____	5
2. Paakanyetso ya Tiro ya ga Jesu mo bathong botlhe _____	9
3. Tiro ya ga Jesu e a Simologa _____	13
4. Tiro ya ga Jesu e ne e le Pharologanyo _____	17
5. Nako ya Ntsifalo _____	21
6. Dikgagamatso le Ditlhaloso Tsa Tsone _____	25
7. Nonofa ya ga Jesu Jaaka Morwa Modimo _____	29
8. Keresete o Ganwa mo Motseng wa Gagabo: Tiro ya Gagwe e a Gola _____	33
9. Kgatelelo ya ga Jesu mo Godimo ga Melao ya Tlholego _____	37
10. Bodiphatsa Jwa Tumelo e e Dirilweng-Ke Motho _____	41
11. Tswelelo ya Dikgagamatso Dingwe _____	45
12. Thanolo ya Tiro ya ga Jesu _____	49

DIKITSISO KA KAKARETISO LE DITAELO SEKOLO SA TSELA YA THUTO YA BAEBELE KA TLHAELETSANYO

Se diretswwe bao ba ise ba ke ba nneng pele le katiso ya thuto ya Baebele. Lefa go ntse jalo e beilwe ka tsela ya gore bao baba ithutileng Baebele ka dingwaga ba tle ba bone thuso mo dithutong tse.

Maikaelelo a dithuto tse ke go aba leano la Modimo la poloko, go katisetsa mo kitsong ya Baebele, le go godisa go-gola ga sekeresete mo modumeding. Mongwe le mongwe le botlhe ba a amogelesega go dira thuto e.

Baebele e tshwanetse go nna fa thoko ga gago ka metlha fa o ithuta dithuto tse. O tshwanetse go bala ka kelotlhoko kgaolo nngwe le nngwe jaaka e tlhaga mo thutong e o e ithutang. Fa go na le mafoko mo Baebeleng gongwe mo thutong a o sa a tlhaloganyeng, jalo o tshwanetse go a batla mo lokwalong lo lo tlhalosang mafoko lo lo siameng.

Phetogo ya aterese. Fa o fetola aterese ya gago ya poso gongwe aterese ya ntlo, tsweetswee itsese mookamedi wa Tsela ya thuto ya Baebele.

Palo ya Moithuti e e tlhomameng. Moithuti mongwe le mongwe yo o kwadilweng mo sekolong sa Tsela ya go Ithuta Baebele ka Tlhaeletsanyo o fiwa palo. Palo e e tlhokega thata ka ntlha ya gora dikwalo tsa gago di bolokwa kafa tlase ga palo ya gago. Fa kwalela mookamedi wa Tsela ta Thuto ya Baebele, o tshwanet go fa Leina-la gago, Palo ya gago ya Moithuti, le Aterese ya gago,

PALO YA GAGO YA MOITHUTI KE E _____

(Ga go na ope gape yo o nang le yone)

Thuto ya Ntlha
KETAPELE YA MAFOKO A A
MOLEMO A GA MAREKO
MAREKO 1:1 – 8

Temana ya Tlhogo:

Mme tse di kwadilwe gore lo dumele fa Jesu e le Keresete, Morwa Modimo, mme ka go dumela lo bone botshelo mo leineng la gagwe: Johane 20:31.

KETAPELE

Thuto ya mafoko a a molemo a ga Mareko e kgaogantswa ka dikwalo di le pedi, longwe le longwe lo na le dithuto di di le lesome le bobedi. Dithuto tsa ntlha tse di lesome le bobedi di bolela ka dikgaolo tsa ntlha tse di borobabodedi tsa ga Mareko. Lokwalo lwa bobedi ke thuto ya dikgaolo tsa bofelo tse di borobabodedi. Go amogela mo gontsi mo dithutong tse, o tshwanetse:

1. Go baya lokwalo lwa gago fa pele ga gago, lo bule fa thutong e o e rulaganyetsang go e ithuta.
2. Bula Baebele ya gago mo Efangeleng ya ga Mareko, mo ditemaneng tse o tshwanetseng go di ithuta.
3. Rapelela kaelo ya Mowa o o Boitshepo jaaka o bala mme o ithuta dithuto tse.

Jaanong o ipaakanyeditse go simolola. Bala kgaolo ya Baebele PELE. Se se a tlhokega. Jaanong bala temana nngwe le nngwe gongwe setlhopho sa ditimana gape jaaka o e ithuta mo thutong. Ka tsela e o tla tlhaloganya sentle sotlhe se se rutiwang mo dithutong tse.

Botlhokwa jwa Mafoko a a Molemo a ga Mareko

Re tlhoka go tlhaloganya tiro e Morena wa rona Jesu o e dirileng mo lefatsheng gore re tlhaloganye ka bophepa Bokeresete gompieno. Efangele e khutshwane e e kwadilweng ke Mareko e re naya lobaka lwa go itse polelo e botoka. Mareko o bolela tiro ya ga Jesu fela. Ga a bolele ka botsalo jwa gagwe. Ka Efangele ya ga Mareko e ne e ka ne e

le nngwe ya nako ya pele ya Diefangele tse di kwadilweng, polelo ya botsalo jwa ga Jesu e ka ne e ne e itsege sentle, mo Mareko o sa akanyang go tlhokega go kwala kaga yone.

SE MAREKO O SE KWALETSENG LOKWALO LO *Mareko 1:1*

A re lebeng mafoko a Efangele ya ga Mareko. Mo kgaolo 1, temana 1, Mareko a re o ya go kwala kaga “mafoko a a molemo a ga Jesu Keresete, Morwa Modimo.” O raya eng ka lefoko le le reng, “efangele”? Lefoko “efangele” le raya “mafoko a a molemo.”

Mafoko a a molemo ke a: Modimo o romile Morwa One wa sebele, ebong Jesu Keresete, mo lefatsheng. Baebele e ruta gore Jesu o ne a feta motho. Bala Bakolosa 2:9 Johane 1:14. Baebele e ruta gore Jesu e ne e le Modimo o tshela mo mmeleng wa setho. Jesaya, Moporofeti was Kgolagano E Kgologolo, o boletse-pele Go-tla ga ga Jesu. Se re se Kwaletsewe mo go Jesaya 7:14. Mo go Mathaio 1:21, re bala gore seporofeto se diragaditswe fa Jesu a tsalwa. Jalo Jesu e ne e le Modimo tota o le mo nameng, a ikitse batho botlhe.

JOHANE MOKOLOBETSI *Mareko 1:2-8*

Tiro ya ga Johane Mokolobetsi e tlhalosiwa mo go Mareko 1:2-8 Go-tla ga ga Johane go diragaditse seporofeto sa gore yo-o-tlang-pele o tla bolela ka go-tla ga Morwa Modimo. Bala ka diporofeto tse mo go Jesaya 40:3 le Malaki 3:1 Johane o ne a na le tiro e tona e le nngwefela, go “baakanyetsa Jesu tsela”. Johane o baakantse tsela jang? Mareko o re bolelela gore o rerile molaetsa wa boammaaruri bo le bobedi: (1) go tlhokega go ikwatlhaya go amogela boitshwarelo jwa sebe, gape (2) Jesu o ne a tla ka bonako.

THANOLO YA BOIKWATLHO *Mareko 1:4*

Temana ya bone (4) ya re Johane o rerile “kolobetso ya boikwatlhao ya boitshwareLO JWA DIBE.” Boikwatlhao bo akaretsa tse di latelang:

1. Pele, motho o tshwanetse go lemoga gore o na le sebe mo botshelong jwa gagwe. Fa motho yo o lwalang a sa lemoge gore o a lwala, ga a ketla a ipatlela thuso mme o tla nna a lwala gongwe a bo a lwale thata. Jalo, lwa ntlha, re tshwanetse go bona gore go na le sebe mo matshelong a rona, mme gore re tshwanetse go dira sengwe kaga sone. Bala Baroma 3:10 le Baroma 3:23.
2. Se se latelang moleofi o tshwanetse go dumela sebe sa gagwe. Se se raya gore fa re sena go bona sebe sa rona, re tshwanetse go dumela

gore ke rona re se dirileng. Ga go a siama go leka go baya mongwe o sele molato, le eleng Satane, ka ntlha ya sebe sa rona. Re tshwanetse go dumelana le Modimo gore re molato le gore re tshwanetswe ke katlhola ya one.

3. Go latela se, go tla khutsafalo, khutsafalo ya nnete, ya dibe tsa rona. Ga go a lekana go futsafalela gore dibe rona di re sotlile. Re tshwanetse go futsafala ka ntlha ya gore re leofile kगतलhanong le Modimo. Bala Pesalema 51:4.
4. Lwa-bofelo, re tshwanetse go eletsa go fularela dibe tsa rona le go di tlogela gore re tle re latele Modimo. Fa re futsafalela dibe tsa rona fela ka ntlha ya gore re tshwerwe, jalo re tswana le legodu le le sa futsafalelang gore le utswile, mme le futsafaleitse fela gore le tshwerwe mme le tla tshwanelwa ke go duela kwatlhao ya tiro-e e phoso ya lone. Fa ese motho a ikwathaya ka boikokobetso o tla gangwe le gape mo sebeng sa gagwe.

BOIPOLELO PELE GA KOLOBETSO *Mareko 1:5-6*

Mo temaneng 5, re bala gore bao ba ba kolobeditsweng ke Johane ba ne ba ipoletse dibe tsa bone. Ke bao fela ba ba dumelaneng le Modimo gore ke baleofi mme ba ipoletse dibe tsa bone mo go one ba ipaakanyeditse go amogela kolobetso. Bala Baroma 6:3-4. Paulo a re kolobetso e supa loso le phitlho ya tlhologo e kgologolo ya motho. Go tswa mo metsing go supa gore jaanong o tshela mo go Keresete. Setshwantsho sa boammaaruri fela sa itemogelo e ke go tsenya modumedi kafa tlase ga metsi.

Ke motho fela yo o ikwatlhaelang dibe tsa gagwe mme a dumela mo go Keresete mme a eletsa go sala Keresete morago mo tseleng e ntsha ya botshelo, yo o tshwanetseng go kolobediwa.

JOHANE O BOLELELA-PELE GO-TLA GA GA JESU

Mareko 1:7-8

Mo ditemaneng 5 le 6, re bala go le mo go oketsegileng kaga monna yo, yo o bidiwang Johane. Thero ya gagwe kaga boikwatlhao le kaga Jesu e amogetse katlego e kgolo ka ntlha ya gore batho ba ne ba lemoga gore thero ya gagwe e ne e tswa kwa Modimong. Mareko a re lefatshe “lotlhe” la Judea le batho botlhe ba Jerusalema ba ne ba tswela kwa-ntle go mo utlwa le go kolobediwa ke ene. Johane o tshedile botshelo jwa go-iitatola le go intsha setlhabelo. O ne a sa dire se go kगतलha batho. O ne a amegile thata kaga molaetsa wa gagwe go

feta kaga kwa o neng a nna teng. Lefelo la gagwe la bonno le supeditse keletso ya gagwe go tswa mo tumelong e tlhomilweng ya Jerusalema, motse-mogolo wa bakwadi le Bafarasai. Diaparo tsa gagwe le dijo di supile boikaego jwa gagwe mo Modimong mme di gaketse batho ka Elija yo o ntseng mo nageng. Molaetsa wa gagwe e ne e le kaga yo o Boitshepo wa Modimo yo o neng a tshwanetse go tla ka bonako. Johane o ne a neetse botshelo jwa gagwe gotlhe-gotlhe mo go “baakanyetseng Jesu tsela.” Mo temaneng 7, Johane o biditse Jesu yo o “nonofileng bogolo go nna,” mme mo temaneng 8 o tshwantshitse Jesu jaaka mongwe yo o tla tlisang Mowa o o Boitshepo wa Modimo. Ke jaaka Johane a itsesitse mofuta o Jesu, Morwa Modimo o tlaabo a le one. Mo thutong ya rona e e latelang re tla bona Jesu a itsesewe rona ke Mareko.

**TLHOMAMISA GORE O BADILE DITEMANA
TSE TSA BAEBELE**

Mareko 1:1-8	Jesaya 40:3
Johane 20:31	Malaki 3:1
Bakolosa 2:9	Baroma 3:10
Johane 1:14	Baroma 3:23
Isaia 7:14	Pesalema 51:4
Mathaio 1:21	Baroma 6:3-4

Thuto ya Bobedi
PAAKANYETSO YA TIRO YA GA
JESU MO BATHONG BOTLHE

Mareko 1:9-20

Temana ya Tlhogo:

A re, Lobaka lo fitlhile, e bile bogosi jwa Modimo bo atametse; ikwatlhaeng, lo dumele Mafoko a a Molemo. Mareko 1:15

KETAPELE

Mo thutong e re batla go ithuta ditiragalo tse pedi tse di tlhokegang. Go di tlhaloganya go tla re thusa go tlhaloganya tiro ya ga Jesu.

1. **Kolobetso ya Gagwe.** Ke ka ntlha ya'ng Jesu a ne a kolobediwa? Kolobetso e raya eng?
2. **Dithaelo tsa Gagwe.** A dithaelo di ne di le nnete? Dithaelo tsa ga Jesu di raya eng?

KOLOBETSO YA GA JESU Mareko 1:9-11

Re ithutile ka bokhutshwane tiro ya ga Johane Mokolobetsi. Jaanong Mareko o simolola go bolela polelo ya ga Jesu. Tiro ya ga Jesu mo bathong botlhe e simologile ka letsatsi lele fa Jesu a bonala gaufi le Noka ya Joredane go kolobediwa ke Johane. Pele Johane o ganne. O rile Jesu o tshwanetse go kolobetsa ene. Bala le Mathaio 3:13-17 kaga kolobetso ya ga Jesu. Potso ka tlwaelo e bodiwa gore, "Ke ka ntlha ya'ng Jesu a kolobeditswe mme a ne a sena dibe tsa go di ipolela?" Kolobetso ya ga Jesu e ne e tletse thanolo . . . mo go Jesu ka sebele, mo go Johane, le mo go botlhe ba ba dumetseng mme ba kolobeditswe fa e sale ka letsatsi leo. Thanolo ya kolobetso ya ga Jesu e ka supiwa ka ditsela tse di latelang:

1. Jesu o Dumelane le Kolobetso ya ga Johane

Kolobetso ya ga Jesu ka e supile tumelano ya gagwe le tiro ya ga Johane. Johane o ne a retetse batho ba ba neng ba tsile go mo utlwa gore ba tshwanetse go ikwatlhaya mme ba kolobediwe. Tota, Kolobetso e ne e le karolo e e tlhokegang thata ya tiro ya gagwe mo eleng gore o ne a sa bidiwe "Johane wa Moreri" gongwe "Johane wa Moporofeti," mme "Johane Mokolobetsi." Bontsi bo ka ne bo rile,

“Re tlhaloganya botlhokwa jwa boikwatlhao, mme ke ka ntlha ya’ng re tshwanetse go kolobediwa?” Ka go tla kwa go Johane batho botlhe ba le teng, Jesu o ne a re, “Ke dumelana le molaetsa wa ga Johane, mme ke dumelana le kolobetso ya gagwe.” Ka tsela e Jesu o dumelane le kolobetso ya ga Johane mme a itshwantsha le batho ba o tsileng go ba boloka. Mo polelong ya ga Mathaio ka kolobetso ya ga Jesu, Jesu o rile, “Mma go nne jalo gompieno; gonne go re tshwanetse go dirafatsa tshiamo yotlhe jalo.” (Mathaio 3:15) Elatlhoko lefoko “re”. Ka tsela e Jesu o ne a itshwantsha le batho botlhe mo lefatsheng ba ba neng ba tlhoka go kolobediwa jaana.

2. Jesu o dumelane le Kolobetso jaaka mokgwa wa Sekeresete

Gape ka go kolobediwa, Jesu o dumelane le kolobetso jaaka sekeresete. Kolobetso e ne e se ntšha, mme Johane o e neile thanolo e ntsha gotlhegotlhe. Fa Moditšbaba (motho yo e ne e se Mojuda) a ne a amogela tumelo ya Sejuda ya nako eo, o ne a tlhokega go dira dilo di le tharo. Pele o ne a ya bogwera. Lwa-bobedi o ne a direlwa setlhabelo mo tempeleng. Lwa-bofelo, o ne a kolobediwa go supa go-tlhatswiwa ga gagwe le botsalano jo boša jo o bo simolotseng. Johane, lefa go ntse jalo, o itsile gore go tsalwa o le Mojuda go ne gosa lekana. O ne a biletsa batho ba gagabo mo tumelong e e tshelang, go ntshafatsa tsholofetso ya bone le Modimo mo dipelong tsa bone. Kwa phetsong ya tiro ya gagwe ya selefatshe Jesu o ne a raya balatedi ba gagwa mo lotsong longwe le longwe a re, “Ke gone tsamayang, lo dire merafe yotlhe barutwa, lo ba kolobetse mo leineng la Rara, le la Morwa, le la Mowa o o Boitshepo.” (Mathaio 28:19)

3. Jesu o Dirile Kitsiso mo Bathong Botlhe

Gape, kolobetso ya ga Jesu e ne e le kitsiso ya gore o ne a ipaakanyeditse go simolola tiro ya gagwe mo bathong botlhe. Ka dingwaga di le masome a mararo Jesu o ne a ntse ka sephiri mo Nasaretha. Jaanong o ne a ineela phatlalatsa mo tirong ya gagwe mo bathong.

4. Modimo o Neile Tumelano ya One

Re bona tumelano ya Rara Wa Legodimo mo godimong ga Jesu ka kolobetso ya gagwe. Mareko o re bolelela gore lentswe le dule kwa legodimong, le re, “O Morwaake yo o rategang; ke itumela thata mo go wena.” (temana 11) Mafoko a a re gakolola ka diporofeto tsa Kgolagano E Kgologolo ka Mesia yo o tlang. Mafoko a, “O

Morwaake” a tswa mo Dipesalemeng mme ke karolo ya thuto ya gobewa bogosi ga Kgosi Mesia. (Pesalema 2:7). Mafoko, “Ke itumela thata mo go wena, a tswa mo tlhalosong ya “Motlhanka wa Morena,” polelelopele ya ga Jesaya 42:1.

THAELO YA GA JESU *Mareko 1:12-13*

Jaanong re tla akanya kaga thaelo ya ga Jesu. Ke ka ntlha ya'ng Jesu a ne a raelwa. O ne a raelwa ka ntlha ya gore Satane le dinonofo tsotlhe tsa bosula di ne di batla go nyeletsa Moitshepi yo wa Modimo yo o neng a tsile go boloka baleofi. Satane o itsile gore fa a ka gogelwa mo sebeng ka thaelo, jalo Jesu o ne a se ketla a nna Mmoloki wa batho. Ke Mmoloki yo o senang sebe fela yo o neng a ka swa jaaka setlhabelo sa baleofi. Fa Satane a ne a ka gapa phenyo mo go Jesu go kabo go ne go sena poloko mo go rona. Bala ka phenyo e e gakgamatsang ya ga Jesu mo go Satane mo go Mathaio 4:1-11.

THERO YA GA JESU *Mareko 1:14-15*

Ditemana 14 le 15 tsa kgaolo e ya ga Mareko di itsese tiro ya thero ya ga Jesu Molaetsa wa gagwe, jaaka o le wa ga Johane Mokolobetse, e ne e le wa boikwatlhao le tumelo. Mme Jesu o ne a ka bolela go-tla ga Bogosi jo Johane o bo boleletseng-pele. Thero ya ga Jesu e ne e le boammaaruri jo bo tlhokegang thata jwa tiro ya gagwe. Jesu o ne a se kake a letla dilo tse dingwe go kgoreletsa thero e. Re bala gore le eleng diphodiso tsa gagwe di ne di dirwa mo methheng ya diphodiso tsa semowa (Bona Mareko 2:5). Ka go-tswelela Jesu o ne a kopa bao o ba fodisitseng go didimala kaga go fodisiwa ke ene. O dirile se gore a tswelile go rera le go ruta mme e seng go latelelwa go fodisa a le nosi. Sebopego sa mmele se a tlhokega, mme mowa wa motho o tlhokega bogolo.

BARUTWA BA TLHOPHILWE *Mareko 1:16-20*

Gase botlhe ba barutwa ba ba lesome le bobedi ba Jesu o ba tlhophileng ba ba rulagantsweng fa ke Mareko. Ela-tlhoko gore Jesu o ba bileditse go nna le ene mme a ba naya tiro ka nako e le nngwe fela. O batlile go ba ruta le go ba katisa ka tsela e e faphegileng gore morago ga loso lwa gagwe ba bo ba ka tsweledisa tiro ya gagwe. Ba ne ba tshwanetse go nna tshimologo ya phuthego e o e tlhomileng. Tiro e Jesu o ba e neileng e ne e le go nna “batshwari ba batho” Ke go re, ba ne ba tshwanetse go nna “baithuti” ba gagwe mme ba tlise ba bangwe go mo itse jaaka Mmoloki. Pele ga mo ba ne ba tshwara ditlhapi. Jaanong ba ne ba tshwanetse go ineela go tlisa batho kwa go Keresete.

**TLHOMAMISA GORE O BADILE DITEMANA
TSE TSA BAEBELE**

Mathaio 3:13-17

Mathaio 28:19

Pesalema 2:7

Jesaya 42:1

Mathaio 4:1-11

Mareko 2:5

Thuto ya Boraro
TIRO YA GA JESU E A SIMOLOGA
MAREKO 1:21 – 2:12

Temana ya Tlhogo:

Mme le gore lo itse fa Morwa Motho a na le thata mo lefatsheng go itshwarela dibe. Mareko 2:10

KETAPELE

Mo ditemaneng tse mo go Mareko re ithuta thata ka tiro ya Morena mo Galelea. Fa ke fa Jesu o ntseng nako ya gagwe e ntsi teng, jalo go re siametse go leba ka kelotlhoko ditiragalo tse re di tthalosediwang fa. Bontsi jwa barutwa ba ga Jesu bo ne bo tswa mo karolong e ya Palasetine. Kwa tshekong ya ga Jesu, lelata mo lelwapeng la moperesiti yo mogolo (Mathaio 26:69-75) le ne la bo la lemoga puo ya ga Petere jaaka ya Mogalelea. Kgaolo ya Galelea e ne e le mo karolong ya bokone jwa Palasetine, kwa bophirima jwa Noka ya Joredane Botshelo mo lefelong la legare go dikologa Lewatle la Galelea le lentle le metse mengwe e le borobabongwe e ne e kokoane go dikologa lotshitshi lwa lone. Maina a metse mengwe a re fa motlhala wa tlhokego ya lewatle le mo matselong a batho. Sekai, leina la motse, "Bethesda" le raya "ntlo ya ditlhapi." Ke fa lewatlang le fa Jesu o boneng Petere, Andrea, Jakobe le Johane ba dira tiro ya go tshwara ditlhapi. A re lebeng jaanong ka kelotlhoko thata tiro ya ga Jesu mo lefelong le.

JESU MO GALELEA *Mareko 1:21-22*

Ke ka ntlha ya'ng Jesu a simolotse tiro ya gagwe mo Galelea? Gongwe ka ntlha ya gore Bagalelea e ne e le batho ba tumelo e e kwateng, mme ba ne ba sa busiwe ke baeteledipele ba tumelo le dipalabalo ka go lekana thata le jaaka batho ba Jerusalema le Judea ba ne ba ntse. Gape, ditsela tse dikgolo tsa kgwebo di ne di ralala Galelea. Jalo molaetsa wa ga Jesu o ne o ka anamela ka bonako kwa Egepeto, Arabia, Syria le kwa mafelong a mangwe. Go feta moo, Galelea e ne e le lefelo le Jesu o goletseng mo go lone. O ne a ka fa Galelea lobaka lo batho ba Judea ba ne ba ise ba lo ipaakanyetse lefa e le go eletsa go lo amogela.

JESU MO NTLONG YA THUTO *Mareko 1:23-28*

Mongwe wa metse ya Galelea e ne e le Kaperenaume. Fa ka letsatsi la Sabata, Jesu o tsene mo ntlong ya thuto mme a ruta. Re

bololelwa ke Mareko se Jesu o se rutileng mo ntlong e ya thuto, mme re bolelelwa gore o rutileng jang. Go ne ga lemosega ka bonako gore motho yo o ne a le pharologanyo. Gore o ne a farologanyo jang mo bakwading le Bafarasai go ne ga supywa fela ka bonako fa Jesu a fodisitse monna yo o neng a na le mowa o o leswe. Mowa o o bosula o itsile nonofo ya Modimo mo go Jesu mme o itsile gore o tloga o senngwa. Mowa o o bosula o goile gore Jesu e ne e le yo o Boitshepo wa Modimo. Lefa mowa o o bosula o buile boammaaruri kaga gagwe, Jesu o ne a se kake a letla bosupi. Se e ne e le ka gonne o tsile go tswa mo motsweding o o leswe. Jalo Jesu o buile kagiso le phepafatso mo monneng yo o tshwerweng ke mowa o o bosula Jaanong batho ba ne ba gakgametse, eseng fela ka mafoko a ga Jesu, mme le ka ditiro tsa gagwe le tsone. O tlhomamisitse taolo ya dithuto tsa gagwe ka go supa nonofo ya gagwe mo phodisong e.

MOGWAGADIE PETERE O A FODISIWA *Mareko 1:29-31*

Taolo ya ga Jesu mo therong le nonofo ya gagwe jaaka mofodisi e dirile tumo ya gagwe le leina la gagwe go phatlalalela mo lefelong la tikologo ya Galelea. Fa a tsene mo ntlong ya morutwa wa gagwe, ebong Petere, Jesu o utlwile ka bolwetsi jwa ga mogwagadie Petere. Barutwa ba ne ba ithuta ka bonako go bolelela Jesu ka matshwenyego a bone. Jesu o ne a le bonako go fodisa molwetsi yo, yo ka bonako o ne a simolola go ba direla. Kgakgamatso e e diretswe mo legaeng le le kwa thoko. Jesu o ne a sa tlhoke gongwe go batla bontsi. Diphodiso tsa gagwe e ne e se tsa ipapatso. Di ne di dirwa jaaka sesupo sa lorato lwa gagwe le nonofo jaaka Morwa Modimo wa nnete. Lemoga gore mosadi yo o fodisitsweng o tsogile mme ka bonako a simolola go ba direla. Mongwe le mongwe wa rona yo o amogetseng Keresete jaaka Mmoloki le Morena o fodisitswe bolwetsing jwa sebe mo dipelong tsa rona. Phodiso e e tla fa re amogela boitshwarelo jwa dibe tsa rona, tse di ka gogelang fela kwa losong fa di sa itshwarelwa. Rona, le rona, re tshwanetse go tsoga go direla Morena wa rona Jesu Keresete gompieno. A re seka ra botsa gore, “Kereke e ka ntirela eng?” Bogolo, a re botseng gore, “Ke ka dira eng ka ntlha ya ga Keresete mo-teng le ka Kereke ya me?”

TSHIMOLOGO YA BONTSI-JWA BATHO *Mareko 1:32-34*

Dilo tse Jesu o di dirileng mo Kaperenaume di ne di se kake tsa fitlhiwa. Jalo maitseboa ntlo ya gagabo Petere e ne e dikologilwe ke bontsi jwa batho ba batla phodiso ka kamo ya ga Jesu. Ba ne ba leta go fitlhelela maitseboa ka ntlha ya gore molao o ne o sa ba letlelele go

rwala bokete bope go ralala motse ka letsatsi la Sabata. Bala Jeremia 17:24 kaga se. Ba ne ba sena disupanako lefa e le tse dinnye mo malatsing ao, jalo nako ya go fela ga Sabata e ne e dumelanwe. Sabata e ne e fela fa letsatsi le phirimile mme go ka bonwa dinaledi di le tharo. Jalo batho ba ne ba leta go fitlhelela ba ka bala dinaledi tse tharo mme ba tlise balwetsi ba bone kwa go Jesu. O ba fodisitse. Gararo re bone Jesu a fodisa batho. “Mo ntlong ya thuto, mo ntlong ya ga Simone Petere, mme jaanong mo ditseleng. Gongwe le gongwe kwa go neng go na le matshwenyego Jesu o ne a ipaakanyeditse go dirisa nonofo ya gagwe. O ne a sa tlhophe lefelo gongwe motho”, o ne a tlhokomela ka metlha batho ba ba mo letlhokong. Tota, batho ba le bantsi-ntsi ba tsile go fodisiwa mo Jesu o ne a ya kwa lefelong le lengwe la Galelea gore a tlea tsewelele le tiro ya gagwe ya go rera.

JESU MO LEFATSHENG LOTLHE *Mareko 1:34-45*

Go tswa Kaperenaume Jesu o ne a ralala Galelea a rera mo matlong a thuto le go fodisa balwetse. Tiragalo e le nngwefela gape ya phodiso e eme mo kgopolong ya ga Mareko fa a kwala kgaolo e ya ntlha. Ke phodiso ya monna yo o neng a na le lepero. Dilo di le pedi di a tlhokega mo phodisong e. Lwa-ntlha go na le kutlwelo-botlhoko le lorato lwa ga Jesu mo monneng yoo latlhetsweng kwa-ntle yo. Batho botlhe ba ba neng ba na lelepero ba nako eo ba ne ba patelediwa go nna kgakala le ba-malwapa a bone kwa ntle ga metse. Dinako dingwe ba ne ba kokoana go nna ditlhophanyana mme ba nna mo dikgageng. Mme Jesu o ratile monna yo o sa rategeng yo a mo tshwara mme a mo fodisa. Jesu o amile motho yo o sa amiweng mme o ratile yo o sa rategeng. Kamo ya gagwe le lorato lwa gagwe di tlisitse kgololo le kagiso mo monneng yo. Selo sa bobedi se se tlhokegang mo phodisong e ke gore bolwetse jo bo boitshegang jaaka lepero bo ne bo ka fodisiwa gotlhe-gotlhe ke Jesu. Batho ba nako eo ba gopotse gore lepero e ne e le phutso e e tswang kwa Modimong. E ne e le Modimo fela o o neng o ka phimola phutso le go tlisa phodiso. Jesu o supile ka bonako gore o na le nonofo ya boitseanape jaaka Modimo a le mo setshwanong sa motho mo lefatsheng. Lepero gape le ne le tshwantshiwa le sebe le phoso mo botshelong jwa motho yo o lwalang. Jalo Jesu o supile nonofo ya gagwe mo godimo ga ditiro tsa sebe. O ka fodisa mmele, mme se se tlhokegang le eleng thata, o ka fodisa mowa o o lwalang sebe wa batho.

DITSALA TSE NNE TSA BOAMMAARURI *Mareko 2:1-12*

Jaanong a re lebeng tiragalo e e fitlhelwang mo ditemaneng tsa

ntlha tse 12 tsa Kgaolo 2 mo go Mareko. Fa re bona ditlhopho di le pedi le batho ba mefuta e mededi ba ba biletsang mo kelong-tlhoko ya rona.

1. BAKGORELETSI. Batho ba le bantsi ba tsile kwa ntlong go utlwa Jesu. Ba ne ba kgobokane fa kgorong, mme molwetse o ne a se kake a tlisiwa kwa go Jesu. Ba ne ba sa lemoge letlhoko la yo mongwe; ba batlile fela go utlwa le go itumedisa kgakgamalo ya bone. Le rona, re ka nna bakgoreletsi fa re ipolela re le Bakeresete, mme re sa tshela jaaka Bakeresete ba tshwanetse. Re ka ne tota re le mo tseleng ya ba bangwe, re ba kganela go tla kwa go Jesu go bolokwa. Jakobe 1:22 o re tlhagisa kgatlhanong le go utlwa Lefoko la Modimo kwa-ntle ga go dira sepe kaga lone.

2. MOTHO YO O SENANG GO ITHUSA. Segole se ne se se kake sa itirela sepe. Baebele ya re botlhe ba leofile mme botlhe ga ba na thuso epe ya go ipoloka. (Bona Barome 3:23). Jalo, batho ba le bantsi ba ntse jaaka monna yo wa segole yo o tlhomolang-pelo.

3. BATHUSI. Banna ba bane ba, ba ba tlisitseng tsala ya bone kwa go Jesu ba dumetse gore Jesu o ka mo fodisa. Elatlhoko mo temaneng 5 gore Jesu o bone tumelo ya bone. Ga ba a ka ba letla bothata go ba emisa go isa tsala ya bone kwa go Jesu. A o dumela gore Jesu o ka boloka ba bangwe mo dibeng tsa bone? Jalo le wena o tshwanetse go tliisa ba bangwe kwa go ene.

4. JESU, MOFODISI. Jesu ke ene fela yo o nang le nonofo ya go itshwarela dibe le go fodisa mmele. Ela-tlhoko go Jesu o bone letlhoko la nnete la monna yo, le e ne e le go itshwarelwa dibe. O supile nonofo ya gagwe ya go itshwarele dibe ka go fodisa mmele. Fa o ise o letlelele Jesu go itshwarela dibe tsa gago, tswee-tswee dira jalo jaanong jaana.

TLHOMAMISA GORE O BADILE DITEMANA TSE TSA BAEBELE

Mareko 1:21 – 2:12

Mathaio 26:69-75

Jakobe 1:22

Jeremia 17:24

Baroma 3:23

Thuto ya Bone
TIRO YA GA JESU E NE E LE
PHAROLOGYANO

MAREKO 2:13 – 3:6

Temana ya Tlhogo:

Mme a ba raya a re, "Sabata o diretswe motho, mme motho ga a direlwa Sabata". Mareko 2:27

KETAPELE

E e ka ne e le thuto e e tlhokegang thata mo go tlhaloganyeng tiro ya ga Jesu. Batho bangwe ga ba itse dipharologanyo tse Jesu o di dirileng. Jesu o ne a sa tla go senya molao wa Modimo. O ne a tsile go tlatsa se molao o ne o ikaeletswe go se dira. Re tshwanetse go tlhaloganya se ka bophepa. Jesu o ganne go golegwa ke melao le mekgwa ya batho. E mentsi ya e e ne e le kgatlhanong le melao ya boammaaruri ya Modimo. Jesu o re supeditse gore go tlhokega go nna le botsalano jo bo siameng le Modimo mo pelong. Ga re a tshwanela go letla melao ya tumelo e e dirilweng ke motho go tla pele ga melao ya Modimo, Gakologelwa, Baebele, Baebele ke yone taolo fela ya dilo tsa tumelo. Taolo ya rona ga e a bewa mo mothong, mme ga e mo motheong Ka go bala le go ithuta Baebele ya rona ka kelotlhoko re ka itse go-rata ga boammaaruri ga Modimo le dithuto tsa one.

TAOLO YA GA JESU E NE E LE PHAROLOGYANO

Mareko 2:13-22

Tiro ya ga Jesu e ne e le pharologanyo. Batho ba lemogile se ka bonako. Ba rile taolo ya gagwe e ne e tswa mo go ene mme e ne e sa tshwane le ya bakwadi le Bafarasai. Jaaka Jesu e ne e le Modimo mo nameng se se tlhalositse gore taolo ya gagwe e ne e tswa kwa Modimong. Bakwadi le Bafarasai ka metlha ba ne ba bolela mekgwa le ditlhaloso tsa Kgologano E Kgologolo tse di dirilweng ke barena le baruti ba bogologolo. Batho ba bone Jesu a fodisa balwetse, a fofolola difofu, a leleka mewa e e bosula, le go itshwarela dibe. ka boammaamuri YO o ne a farologane le batho ba bangwe botlhe. Jaanong, ka ditiro tsa ga Jesu le mafoko a gagwe ka sebele, ba ne ba ka bona gore tiro ya gagwe e ne e ya go farologana.

Bakwadi le Bafarasai ba ba neng ba busa ba ganeditse Jesu mo matlong a ditempele mme ba mo pateletsa go tswela kwa-ntle kwa nageng. Tiro ya gagwe jaanong e ne e le go rerela ba ba neng ba tla

kwa go ene. O ne gape a laela barutwa ba gagwe ka tsela e e faphegileng. A re lebeng ditiragalo dingwe tse di supileng pharologanyo fa gare ga tiro ya ga Jesu le tiro ya bakwadi le Bafarasai.

1. Jesu O Biditse Mathaio Go Nna Morutwa

Mareko 2:13-14

Bakwadi le Bafarasai le batho ba gagabo ba ne ba ila Mathaio. (Mathaio gape o ne a bidiwa Lefi). E ne e le mokgethisi, mme tiro ya gagwe e ne e le go phuthela mmaba yo o laotseng lefatshe la Bajuda madi. Baroma ba ne ba rekisitse tshwanelo ya go phutha makgetho mo lefelong lengwe mo moreking yo o kwa godimo-dimo. O ne a ka rekisetsa ba bangwe dikarolo tsa lefelo la gagwe go itirela koketsego ya madi. Ba ba bofelo ba ne ba tshwanetse go phutha mo go lekaneng go duelela tshwanelo ya bone ya go phutha makgetho le go dira koketsego e e siameng. Bangwe ba bakgethisi ba ne ba le pelotshetlha. Ba phuthile go feta tlhotlha ya ditshwanelo tsa lekgetho la bone le koketsego e e siameng. Bakgethisi ba ne ba sa ratiwe ke Baroma ka ntlha ya go phutha makgetho, mme ba ne ba ilwa ke Bajuda ka ntlha ya tiro ya bone. Mme Jesu o bone se mathaio o ka nnang sone jaaka morutwa. Lokwalo lwa ntlha lwa rona lwa Kgolagano Entsha, Efangele ya ga Mathaio, lo kwadilwe ke morutwa yo wa ga Jesu.

2. Jesu O Jele le Baleofi ba Lobaka Loo (Mareko 2:15-17)

Mathaio o file Jesu le barutwa ba gagwe dijo. O ne a laleditse bakgethisi jaaka ene le ditsala. Baeteledipele ba Bajuda ba kgaletse Jesu go ja le batho ba. Mo go bone moleofi e ne e le mongwe le mongwe yo o neng a sa tshela ka mekgwa le melao ya bone. Jesu o arabile gore maikaelelo a gagwe e ne e le go boloka mewa. Bao ba kgadileng Jesu ba ne ba tswana le motho yo o lwalang, yo o sa itseng gore o a lwala mme jalo a se kake a thusiwa.

3. Jesu O Arabile Potso Ya Go-itima Diyo (Mareko 2:18-20)

Bajuda botlhe ba ne ba ikitsa dijo letsatsi le le lengwefela mo ngwageng nngwe le nngwe, ka Letsatsi la Tetlanyo, mme Bafarasai ba ne ba itima dijo malatsi a mabedi beke nngwe le nngwe. Ba ne ba dira se go galalediwa, eseng go galaletsa Modimo. Go-itima dijo ga bone go ne go sa tlhokege jaaka go ne go lebega. Ba ne ba ka ja pele ga letsatsi le tswa le morago ga letsatsi le phirima. Ba ne ba itima dijo mo dinakong tsa motshegare fela. Gape ba ne ba itshasa go fetola difatlhogo tsa bone go supetsa batho gore ba ne ba itima dijo. E ke ntlha e nngwe e Jesu o ba e kgaletseng.

4. Jesu O File Ditshwantsho di le Pedi go Supa Gore Tiro Ya Gagwe e ne e Tshwanetse go Farologana. Mareko 2:21-22

LWA-NTLHA, o file sekai sa go rokelela letsela le lentšha, le le sa sosobaganang mo seaparong se se-gologolo. LWA-BOBEDI, o file sekai sa go tshela bojalwa jo bontšha mo letlalong le legologolo la bojalwa. Go ne go sena mabotlolo a digalase mo lobakeng loo. Ba ne ba baya bojalwa mo matlalong. Matlalo a magologolo a ne a omelela. Fa bojalwa jo bontšha bo ne bo tshelwa mo go one a ne a phanngwa ke go buduloga, bojalwa bo tshologe le letlalo le gagoge. Dikai tse pedi tse di supa gore Jesu o tlhalositse gore tiro ya gagwe e ne e se kake ya tshagediwa ke tumelo e kgologolo ya Sejuda. Letsela le lentšha le ka gagola letsela le legologolo, le bojalwa jo bontšha bo ka phanya matlalo a bojalwa a magologolo. Ka tsela e e tshwanang, tumelo e ntšha le tlhaloso e ntšha e Jesu o e tlišitseng go tswa kwa Modimong e ne e se kake ya tshagediwa mo tumelong e kgologolo ya Sejuda. A re re gape Jesu o ne a sa tla go senya dithuto tsa Kgolagano E Kgologolo. Boemong jwa se, o ne a tsile go diragatsa le go baakanya diphoso di le dintsi tsa ditlhaloso tse di phoso tse batho ba ne ba di ba file.

DITIRO TSA GA JESU DI NE DI FAROLOGANE Mareko 2:23-28

Tiragalo e nngwe e supile sentle jaaka tiro ya ga Jesu e ne e tla farologana jang le ya bakwadi le Bafarasai. Fa Jesu le barutwa ba gagwe ba raletse masimo a mabele ka Sabata, barutwa ba robile diako tsa mabele mme ba di ja. Bafarasai ba akantse go roba ga diakonyana tsa mabele ka letsatsi la Sabata e le sebe, Jesu o supile gore o ne a le mogolo go feta melao ya bone e e imeditseng batho. O rile ke Morena wa Sabata. Jaaka Modimo mo nameng o ka dira se o se batlileng ka Sabata. Jesu o rile o ka ruta barutwa ba gagwe ka Mowa O O Boitshepo O O neng o tla (Bala Johane 14:26) Se se supile le eleng pharologanyo e ntsi fa gare ga tumelo ya Sejuda le tiro ya ga Keresete.

LORATO LWA GA JESU LO FAROLOGANE Mareko 3:1-6

Tiro ya bofelo ya ga Jesu e e mo idisitseng baba ba gagwe le go batla go mmolaya e ne e le go fodisa monna yo o letsogo le omeletseng ka letsatsi la Sabata. Jesu o ne a ba galefela ka ntlha ya gore ba akantse gore go ne go tlhokega thata go gakologelwa letsatsi go na le go fodisa monna yo o golafetseng. Bafarasai le Baherodia e ne e le baba, mme ba ne ba ikopanya mmogo go leka go senya Jesu. Ba ne ba tsile mo ntlong ya thuto, eseng go obamela Modimo, mme go baya Jesu molato. O ne a ba galefetse, mme gape o ne a futsafaditswe ka gore ba ne ba se kake ba tlhaloganyana se o neng a leka go se dira mo

lefatsheng. Ga ba a gana go dumela Jesu fela, mme ba dirile le eleng maano a go mo senya. Lefoko “senya” le raya gore ba ne ba ikaletse go dira sengwe se ba ka se kgona go pitlaganya tiro ya ga Jesu le go mmolaya. Se se re supetsa jaaka sebe se ka fougatsa matlho le go sokasoka motho. Se ka mo dira gore a seka le eleng go itse Modimo fa a o bona. Jesu Keresete e ne e le Modimo o nna mo lefatsheng jaaka motho. O ne a futsafetse ka ntlha ya go se dumele ga batho ba Ga ba a gana go itse sesupo sa boammaaruri sa gagwe fela, mme gape ba simolotse go loga maano a go mmolaya.

**TLHOMAMISA GORE O BADILE DITEMANA
TSE TSA BAEBELE**

Mareko 2:13 – 3:6

Ditiro 20:7

Johane 14:26

1 Bakorintha 16:2

Thuto ya Botlhano NAKO YA NTSIFALO

Mareko 3:7-35

Temana ya Tlhogo:

Ntlo le yone fa e ikgaogantse, ntlo eo ga e ketla e nonofa go ema.
Mareko 3:25

KETAPELE

Karabo mo tirong ya ga Jesu e ne e sa ganwe ke batho botlhe. Batho ba le bantsi ba ne ba gogelwa ke dikgagamatso tsa gagwe le dithuto tsa gagwe. Bathonyana-fela ba ne ba tshikinngwa segolo ke thuto ya ga Jesu. Ba ne ba kokoana go mo dikologa gongwe le gongwe kwa o neng a ya teng. le eleng fa a ne a ka leka go itapolosa, go rapela, gongwe go ruta barutwa ba gagwe, Jesu o ne a se kake a tswa ka motlhofo mo bontsing jwa batho. Fa a dule mo metseng a ya kwa lewatleng, ba mo latetse go tswa mo dintlheng tsoatlhe tsa lefatshe.

GO-TSWA *Mareko 3:7-10*

Go lebega go ne go na le dintlha di le pedi tsa go tswa ga ga Jesu mo matlong a thuto. Ntlha nngwe e ne e le gore bakwadi le Bafarasai le baetedipele ba bangwe ba ditumelo ba ne ba tswetse-pele thata go ila Jesu le dithuto tsa gagwe. Go ne go na le go le gontsi mo Jesu o batlileng go go bua le go go dira, jalo o ne a tswa mo mafelong a bakwadi le Bafarasai ba ne ba na le tlhotlheletso e e bosula e kgolo thata.

Ntlha e nngwe e ne e le matšhutitšhuti a batho a a ne a mo sala morago a tswa mo metseng e e nang le batho ba le bantsinsi. Bontsinsi bo ne bo tswa kgakalagakala go mo utlwa, go fodisiwa ke ene, le go lebelela dikgagamatso tsa gagwe. Tota, batho ba le bantsinsi ba ne ba itlhaganelela go mo ama, ba sa emele Jesu go ba ama, mo o neng a tshwanelwa ke go nna a baakantse mokoro o monnye go kgona go falola keletso ya bone ya go mo ama.

JESU O DIDIMATSA MEWA E E MASWE *Mareko 3:11-12*

Mareko o re bolelela gore Jesu o iditse mewa e e maswe go mo supela. Lefa mafoko a e a buileng a ne a le boammaaruri, a ne a tswa mo motsweding o o leswe, ebong mo meweng e e maswe. Lefa go ntse jalo, mewa e e maswe e ne e patelediwa go ikobela Jesu mme e tswa mo bathong ba ba lwalang. Mewa e e leswe e itsile gore Jesu e ne e le

Morwa Modimo, mme kitso ga e a e boloka. Batho ba ka dumela boammaruri jotle jwa Baebele mme ba nna ba latlhega. Le eleng gompieno botshelo jo bo itshekologileng jo bo tshelwang ke mongwe yo o porofetang Keresete jaaka Mmoloki o ka itsa lefoko lepe la tshupo go tswa mo dipounameng tsa gagwe. Go na le puo e e reng, "Se o se DIRANG se buela kwa godimo, ga ke kake ka utlwa se o se buang." Ke go re, mongwe o ka bua dilo tse di siameng ka molomo wa gagwe, mme fa tsela e o tshelang ka yone e farologana le se o se buang, se o se dirang se tla tlhokomelwa thata go feta se o se buang. Go utlwiswa-botlhoko jang mo Mokereseteng, yo o bolokilweng ka setlhabelo sa ga Keresete, go se kgone go fa tshupo e e siameng ya Morena wa gagwe ka ntlha ya gore botshelo jwa gagwe bo latola boammaaruri jwa se o se buang. A re seka ra didimadiwa ka tsela e.

BA BA LESOME-LE-BOBEDI BA A TLHOPHIWA

Mareko 3:13-15

Re setse re bone gore Jesu o dule mo metseng ka gonne o ne a na le go le gontsi go go ruta barutwa ba gagwe. Mme le eleng teng kwa nageng o ne a pitlaganngwa ke bontsintsi jwa batho. O tlhophile barutwa ba gagwe ba sebele mo bontsing mme a ba tseela kwa thoko go ba rutela pele. Mo ditemaneng 14-15 tsa kgaolo e re bala gore Jesu o ba tlhomile. Seo se raya gore o ba tlhophile go tswa mo bontsing mme a ba beela kwa thoko ka ntlha ya tiro e o batlileng ba e dira. Gape o ba file nonofo go fenywa mewa e e maswe, le nonofo ya go fodisa. Lokwalo lwa Ditiro lo re kwalela dingwe tsa ditiragalo tse. Modimo o santse o naya dinonofo tse tsa go rera, go fodisa le go kgarametsa ntle mewa e e bosula le mo lobakeng lo. Mme o di naya bao fela o ba tlhophang. Se ka metlha se direlwa kgalalelo ya one fela, eseng go galaletsa gongwe go tlotla motho mongwe.

BA BA LESOME-LE-BOBEDI BA REWA MAINA (*Mareko 3:16-19*)

Re newa maina a Baapostolo gongwe barutwe barutwa ba ba lesome-le-bobedi ba ga Jesu fa. Go a kgalatla go lemoga gore re itse go le gonnye kaga bontsi jwa barutwa ba ba lesome-le-bobedi ba pele. Mongwe wa bone, ebong Judase, o ekile Morena wa rona. Petere o itatotse Keresete kwa tshekong ya gagwe. Lefa go ntse jalo re itse gore e ne e le mo palonyaneng e Modimo o thaileng kereke mo lefatsheng. Fa barutwa lwa-bofelo ba lemogile gore Jesu e ne e le Morena le Keresete, e ka nna morago ga tsogo ya gagwe, ba ntse batlhabani ba ba nonofileng ba Modimo. Ba kgoromeleditse mewa e e maswe kwantle, ba fodisitse ka leina la ga Jesu, mme ba rerile ka nonofo e kgolo.

PEO-MOLATO YA “DITSALA” *Mareko 3:20-21*

Re santse re bala gape ka bontsi jwa batho ba kokoanetse Jesu le barutwa ba gagwe. Ka nako e bontsi bo ne bo tswelletse go reetsa barutwa le Jesu mo ba ne ba sena nako ya go ja. Se se tlišitse peo-molato gore gongwe Jesu e ne e le setseno, gore o latlhegetswe ke tlhologanyo ya gagwe ya go akanya gotlhe-gotlhe. “Ditsala” tse di umakiwang fa e kabo e ne e le ba-lelwapa la ga Jesu’ ba go buiwang ka bone gape moragonyana mo kgaolong e. E ka ne e le batho ba ba itsileng Jesu kwa Nasaretha. Jesu ka sebele o rile moporofeti ga a na tlotlo mo lefatsheng la gagabo. Se e ne e le boammaaruri tota mo seemong sa ga Jesu.

PEO-MOLATO YA BAKWADI *Mareko 3:22-27*

Jaanong bakwadi, ba go lebegang ba ne ba tswa Jerusalema ka maikaelelo a go baya Jesu molato, ba beile molato o motona kgatlhanong le Jesu. Ba beile Jesu molato wa go dirisa nonofo ya badimo e e tswang mo go Beelesebube, Kgosana ya botiabolo, go kgoromeletsa ntle mewa e e maswe. Ka kgakgamatso e e motlhofo Jesu o buseditse peo-molato kwa go bone. Fa nonofo ya ga Satane e ne e dirisiwa go tlhabantsha mewa e e maswe, jalo puso ya ga Satane e ikgaogantse. Se e tlaabo e le bosupi jwa boammaaruri jwa gore e tla senngwa. Jesu o rile, “Fa bogosi bo ikgaogantse, bogosi joo ga bo kake jwa ema.” (temana 24). Se e ne e le bosupi jwa nnete gore Jesu o ne a sa dirise nonofo ya badimo.

SEBE SE SE SA KAKENG SA ITSHWARELWA *Mareko 3:28-30*

Jesu o rile bakwadi ba ba bayang-molato ba ne ba le mo diphatseng tsa go dira sebe se se sa kakeng sa itshwarelwa. Jesu o rile mefuta yotlhe ya dibe e ka itshwarelwa fa ese fela se se se kgatlhanong le Mowa O O Boitshepo. Se se raya gore, sebe sa bone e ne e le gore ba ganne go itse Jesu jaaka Modimo mo nameng, o senoletse batho. Tota, ba tswelletse ka go re Jesu o ne a laolwa le eleng ke Satane ka sebele. Ba ne ba bitsa Morwa Modimo ka sebele, motlhanka wa ga diabolo. Fela fa motho a dira se ga a kake a ikwatlhaya mme jalo ga a kake a itshwarelwa. Ba ganne go itse motswedi fela wa nnete wa boitshwarelo, o e leng tumelo mo go Morena Jesu Keresete. Baebele e ruta ka bophepa gore ga go kake ga nna le boitshwarelo lefa e le poloko fa ese ka Jesu Keresete. Bona Ditiro 4:12 le Johane 8:24. Sebe fela se se sa itshwarelweng jaanong ke go-se-dumele mo go latolang Keresete jaaka Mmoloki, jalo motho o ikgaola mo motsweding o o nosi wa boitshwarelo.

BA GAGABO JESU BA BOAMMAARURI *Mareko 3:31-35*

Lwa-bofelo le eleng ba lelwapa la ga Jesu ba tsile go leka go tseela gae le bone. Se se re bolelela gore ka nako e ba-lelwapa la ga Jesu ba lefatshe ba ne ba sa mo itse gore e ne e le mang. Morago, lefa go ntse jalo, re fitlhela mmaagwe Jesu le bo-monnawe mo barutweng ba ba kopaneng go rapela morago ga tlhatlogo ya gagwe (Ditiro 1:14). E santse e le morago re bona Jakobe, monnawe Jesu, e le moeteledipele yo o nonofileng mo kerekeng ya Jerusalema (Bagalatia 1:19). Ela-tlhoko polelo ya ga Jesu gore ba ba dirang go-rata ga Modimo ke ba gagabo ka boammaaruri. Se se raya gore botlhe ba ba dumelang ka boammaaruri mo go Jesu mme ba mo amogela mo dipelong tsa bone ke ditokololo tsa ba lelwapa la gagwe. Jesu o boleletse Nikodemo gore o tshwanetse go tsalwa seša pele ga a ka tsena bogosi jwa Modimo (Johane 3:3-8). Jalo re tshwanetse go tsalwa seša ka tumelo mo go Morena Jesu gore re nne karolo ya lelwapa la Modimo, le le akaretsang ditso tsothle, banna le basadi. Mongwe le mongwe yo o tsaletsweng mo lelwapeng la Modimo ka tsalo e ntšha ya semowa ya boikwatlhao le tumelo mo go Keresete ke tokololo ya nnete ya lelwapa la Modimo.

TLHOMAMISA GORE O BADILE DITEMANA

TSE TSA BAEBELE

Mareko 3:7-35

Ditiro 1:14

Ditiro 4:12

Bagalatia 1:19

Johane 8:24

Johane 3:3-8

Thuto ya Borataro DIKGAKGAMATSO LE DITLHALOSO TSA TSONE

Mareko 4:1-34

Temana ya Tlhogo:

Mme ba ke ba ba jadilweng mo mmung o o molemo; ba utlwa lefoko, ba le tshole, ba ungwe, masome mararo, le masome maratato, le lekgolo. Mareko 4:20

KETAPELE

Mareko jaanong o tlogela dikgakgamatso tsa ga Jesu go fetela kwa dithutong tsa gagwe ka ditshwantsho. Tlhaloso nngwe ya setshwantsho ke gore setshwantsho ke polelo e khutshwane e e bolelwang ka tsela ya papiso go ruta dithuto dingwe gongwe legare la boammaaruri. Lefoko “setshwantsho” le raya “go latlhela go bapa”. Setshwantsho, jalo, ke polelo e e latlhetsweng go bapa le boammaaruri jo botona go dira tlhaloso ya yone go utlwala sentle. Setshwantsho se tshwana le papiso e e dirisediwang go tlhalosa ntlha nngwe. Fa re tlhalosa ditshwantsho re tshwanetse go nna tlhoko thata re seka ra gatelela thanolo go feta jaaka mmui a ikaeletse. Setshwantsho se tlhalosa nnete e le nngwefela, gongwe, bogolo jwa dinnete tse pedi tse ditona. Tlhaloso ya sone e seka ya pitikololwa gongwa go newa dikakanyo tse dingwe tse di sa ikaelelwang ke mmui wa pele. Go ithuta thuto mo setshwantshong re tshwanetse go botsa dipotso tse di latelang:

1. Boammaaruri jo botona jo mmui o batlileng bareetsi go bo ithuta ke bofe? Ga re na tshwanelo ya go oketsa ditlhaloso tse di sa ikaelelwang ke mmui mo setshwantshong.
2. Setshwantsho se tlisa boammaaruri jo jang?
3. Ke ka dirisa boammaaruri jo jang mo botshelong jwa me?

Fa re tshegetsa dipotso tse mo kgopolong fa re ithuta ditshwantsho tsa ga Jesu re tla amogela tlhhaloganyo ya semowa e ntsi e e tlhamaletseng.

JESU O RUTILE KA DITSHWANTSHO Mareko 4:1-2

Re bolelelwa mo kgaolong 4, temana 34 gore Jesu o dirisitse ditshwantsho tsa ga Jesu di itsege mo lefatsheng lotlhe ka ntlha ya bontle jwa tsone le tlhaloso. Moruti yo mogolo o itsile go kgatlha

megopolo ya bao ba neng ba mo utlwile ka boammaaruri. Ditshwantsho tsa ga Jesu di ratile nnete ya semowa, e e sa khutleng. E boammaaruri mo go rona gompieno jaaka e ne e ntse mo bathong ba ba mo utlwileng a e bua lwa-ntlha.

MEFUTA E MENE YA MMU *Mareko 4:3-20*

Fa, mo kgaolong e, Jesu o boletse setshwantsho a bo a fa le tlhaloso ya sone ka esi. Re ka e bitsa “Setshwantsho sa Mebu,” ka gone seemo sa mmu se ne se laola thobo ka gale. Jesu o tlhalositse gore polelo ya gagwe e ne e se kaga go lema ga nako eo. Go na le tlhaloso e e boteng, ya semowa mo polelong. Lwa-ntlha, Jesu o tshwantshitse peo le Lefoko la Modimo, gongwe mafoko a a molemo. Mojadi ke yo o rerang gongwe go se jalo go phatlalatsa mafoko a a molemo. Elatlhoko gore mo go mongwe le mongwe wa mene ya mmu mojadi e ntse ke ene fela le peo e ntse ke yone fela, mme maungo a farologanye thata. A re lebeng mebu le maungo mo mmung mongwe le mongwe.

1. Mmu O O Thata

Lwa-ntlha, go na le peo e e wetseng mo tseleng. Mmu o o thata o, o ne o gatakilwe ke dinao tsa batho ba le bantsi. O ne o se kake wa amogela peo go tsena mo-teng ga one. Mofuta o wa mmu o emela batho ba ba utlwang Lefoko la Modimo, mme ba sa le amogele. Jalo diabololo a le phamole mme go seke go nne le maugo a a robiwang mo go lone. Diabololo, yo o emetsweng ke dinonyane fa, o bonako go tlosa lengwe le lengwe le le molemo le le ka welang mo-teng ga pelo ya gago. Jesu a re re seka ra reetsa fela, mme re tshwanetse go amogela Lefoko ka tlhaloganyo mme re eletse go dira se le re se bolelelang go se dira.

2. Mmu O O Maje

Mofuta wa bobedi wa mmu ke o go nang le maje mo go one. Ke gore, mmu o khurumeditse ka bosesane leje le le ikadileng kafa tlase ga one. Go na le mmu o montsi o o ntseng jaana mo kgaolong ya Palesetine kwa Jesu o boletseng polelo e teng. Mmu o emetse bao ba ba amogelang Lefoko la Modimo fa ba le utlwa, mme ba seke ba tswelile le Modimo. Ba lemoga gore Lefoko le molemo le boammaaruri, mme ga ba eletse go dira jaaka ba itse gore ba tshwanetse, mo go diragatseng Lefoko le. Go na le batho ba le bantsi ba ba ntseng jaana gompieno. Ba re ba batla go nna Bakeresete, mme ga ba eletse go ikobela Lefoko La Modimo le le jadilweng mo dipelong tsa bone. Mofuta o wa mmu o tshegetsa dipeo selekanyo sa

go re di mele, mme fa nako ya go-gola mo go tlhokegang thata go tla, mmu ga o boteng go fepa dijalo jalo di a swaba mme di swe. Go na le bangwe ba ba lebegang ba dumetse, mme ditiro tsa bone di supa gore ba dirile boitlamo ka melomo ya bone fela mme eseng ka matshele a bone.

3. Mmu O O Mitlwa

Mofuta wa boraro wa mmu ke o o sa tlhagolwang medi ya ditlhare tse di mitlwa tse di neng tsa tlhoga foo. Mmu o ka lebege o siame, mme o ka bonala o baakantswe sentle, mme kafa tlase ga mmu go na le bodiphatsa mo peong. Mofuta o wa mmu o emela bao ba ba utlwanng Lefoko mme ba le amogele mo dipelong tsa bone, mme le sa ungwe maungo gope ka ntlha ya dilo tse dingwe tse di mo matshele a bone. Ditlhokomelo tsa lefatshe ke dikgatlhego mo dilong tse di ganetsanang le Modimo. Se se ka akaretsa go rata go nwa bojalwa gongwe mekgwa e mengwe e e maswe tse di senyang kgatlhego ya mongwe mo dilong tsa Modimo. Boitumelo mo dikhumong ke keletso ya go nna le dilo mo eleng gore keletso go ruiwa ke Modimo e latlhegile. Tsietso mo keletsong ya dikhumo ke gore e solofetsa dilo tse dintsi tse di siameng, mme kwa bofelong, dikhumo ga di kake tsa tlisa ditlhotlwa dipe tse di sa feleng le tse di tlhokegang thata tsa botshelo. Tiragalo e e utlwisang botlhoko mo go tsotlhe tse ke gore peo, e e emetseng Lefoko la Modimo, e hupediwa gotlhe-gotlhe mme ga go robiwe leungo lepe.

4. Mmu O O Molemo

Lwa-bofelo re bona mmu o o molemo o mo go one peo e golelang go ntsha thobo e e itumedisang. Ba ke bautlwi ba ba amogelang Lefoko la Modimo, ba le dumela ka nnete mo dipelong tsa bone, mme jalo ba direla mo godimo ga se ba se utlwileng mme ba se amogetse. Fa O ise o ke o amogele Jesu Keresete jaaka Mmoloki wa gago wa sebele, dira jalo gompieno mme o ungwelwe Modimo.

LOBONE LO LO PHATSIMANG *Mareko 4:21-25*

Bao ba utlwileng setshwantsho sa ga Jesu ba ka ne ba boditse sentle gore, "Fa bontsi jo bo kalo bo gana go amongela Lefoko, go tselwang matshwenyego a go le bolela?" Jesu o arabile potso e e ntseng jalo mo setshwantshong se se khutshwane se. O rile mo tinafalong, "Ga o na tlhopho. O tshwanetse go ntsha bosupi jwa tshegofatso ya Modimo mo botshelong jwa gago gore bao ba ba tshelang mo lefifing ba tle ba itse mme ba amogele mafoko a a molemo, le bone. Lobone ga lo a tshwanela go fitlhiwa. Mokeresete ga a a bolokelwa go fitlha bosupi jwa gagwe. Re boloketswe go dira.

PEO E E GOLANG KA SEPHIRI *Mareko 4:26-29*

Setshwantsho se se khutshwane se se supa gore ga re kake ra itse ditiragalo tsa go tlhakanela mafoko a a molemo go fitlhelela morago thata. Setshwantsho se se re bolelela sengwe kaga go-gola ga bogosi jwa Modimo. Jaaka go-gola ga tlholego, go-gola ga bogosi ga bo lemosege. Ga re kake ra bona setlhatshana se gola, mme fa re boela kwa go sone morago ga malatsi re sa se bone re ka lemoga gore se godile. Go-gola ga bogosi le gone go tlhomame. Bosigo le motshegare, ngwaga le ngwaga bogosi bo a gola. Go-gola ga bogosi, jaaka tlholego, ga bo kganelesege. Le eleng dinonofa tsa loso ga di kake tsa kganela tswelopele ya bogosi jwa Modimo (Mathaio 16:18).

PEO YA MOSETARA *Mareko 4:30-34*

Tshimologo ya bogosi e nnye jaaka peo ya mošetara. Jesu o ka ne a ne a bua kaga tiro ya gagwe, e e ne e le fela mo lefelong le lennye la Palesetine, mme nako e ne e tla tla e mafoko a gagwe le botshelo jwa gagwe – a a amang a neng a tla itsewe le go utlwiwa mo tikologong ya lefatshe. Ditshwantsho tse tsotlhe di supa gore fa peo ya mafoko a a molemo e jalwa ka boikanyego, lefa di tshimologo di ka nna dinnye, kwa bofelong go tla nna go-gola le thobo.

TLHOMAMISA GORE O BADILE DITEMANA TSE TSA BAEBELE *Mareko 4:1-34, Mathaio 16:18*

Thuto ya Bosupa
NONOFO YA GA JESU JAAKA
MORWA MODIMO

MAREKO 4:35 – 5:43

Temana ya Tlhogo:

Mme ba boifa thata thata, mme ba re, “Ana motho yo e a bo e le mang, fa e bo ne ne phefo e mo utlwa le lewatle jaana? Mareko 4:41

KETAPELE

Mo dikgaolong tsa ntlha tsa Efangele ya ga Mareko, re bone nonofo ya ga Jesu mo go fodiseng bolwetse le mo go fepeng dikete. Jaanong Mareko o tla re supetsa gore ga go na lefelo lepe le nonofo ya ga Jesu eseng kgolo. Dilo tsa tlholego tse di dirileng phefo le lekhubu le matsubutsubu di obamela taolo ya gagwe. Mefuta yotlhe ya malwetse a sia fa tlase ga phodiso ya gagwe ka kamo. Lwa-bofelo, jaaka teko e kgolo, Jesu o supa gore o na le nonofo mo godimo ga loso ka sebele.

NONOFO YA GA JESU E KGOLO

Dithuto tsa ga Jesu di supile gore e ne e se motho fela. Batho fela ba lemogile gore o ne a na le taolo e e neng e le mo go ene e e neng e sa tshwane le ya bakwadi (Mareko 1:22). Jaanong le eleng ditshupo tse dingwe di a newa tse di supang nonofo ya ga Jesu mo lefelong lengwe le lengwe la botshelo. Jesu o na le nonofo le taolo mo tlholegong. Johane 1:3 e re bolelela gore e ne e le Jesu yo ba neng ba le mmogo le Modimo mo lobopong. Se se raya gore Jesu o ne a le teng mo tshimologong mme o ne a lekana le Modimo. Gape, re bona nonofo ya gagwe mo bolwetseng, go akaretsa mofuta mongwe le mongwe wa mowa o o maswe. Go feta foo, re bona nonofo ya gagwe mo godimo ga mmaba yo motona-tona, ebong loso. Jalo Mareko o supa gore ga go na lefelo lepe kwa nonofo ya ga Jesu eseng kgolo teng.

JESU O NA LE NONOFO MO GODIMO GA TLHOLEGO

Mareko 4:35-41

Jesu o ne a lapisitswe ke go rera le go fodisa. Ka go eletsa go tswa mo matshutitshuting a batho ka nakonyana, Jesu le barutwa ba gagwe

ba tsene mo mokorong go kgabaganya lewatle la Galelea. Nako e ntsi lewatle le le ne le didimetse le le kagiso. Ke letšha le le tona tota, la selekanyo fela sa dikilometara tse 13 boatlhamo le dikilometara tse 23 boleele. Ka ntlha ya dithaba le melatswana e e le dikologileng, lefa go ntse jalo, matsubutsubu diphefo tsa tshoganyetso di ne di ka tlola go tswa mo letšheng. Se ke se se diregileng ka letsatsi leo. Jaaka phefo e ba wela, barutwa ba tsosa Jesu, yo o neng a robetse kwa karolong ya kwa morago ya mokoro. Re bona kakanyo ya gore phefo e ne e boitshega jang ka poifo ya bone ya gore mokoro o ne o ka nwela ka bone. Ka lefoko la ga Jesu, metsi a ne a didimadiwa. Mme Jesu o ne a kgalemelela barutwa go tlhabela tumelo ga bone. Gongwe o ne a ba tlhagisa gore nako nngwe le nngwe fa diphefo tsa pelaelo le poifo di ba tlela, ba tshwanetse go retologela kwa go ene mo tumelong. Tiragalo e mo barutweng e ne e le poifo, gongwe tlotlo e kgolo. Phefo e ne e sa ikemisa ka bo-yone ka tshoganyetso. E ne e didimaditswe ke lefoko la ga Jesu. Ba ne ba gakgamala gore e ne e le motho wa mofuta ofe. Ba ne ba ithuta ka bonnye le ka bonnye gore Jesu e ne e se motho fela, mme gore e ne e le Morwa Modimo le ka nonofo.

JESU O NA LE NONOFO MO GODIMO GA MEWA E E MASWE
Mareko 5:1-20

Fa ba tshedile lewatle mme ba tsene fa lotshitshing, Jesu le barutwa ba gagwe ba ne ba kgathantshiwa ke monna yo o neng a na le mewa e e maswe. Dintlha di le dintsi di re supetsa gore seemo sa gagwe se ne se tlhokofetse jang. O ne a nna mo dikgageng, tse gape di ne di dirisiwa jaaka diphupu. O ne a se kake a thusiwa ke batho ba gagabo, ka gonne ba ne ba se kake ba mo laola ka tsela epe. Go feta moo, o ne a itshega ka maje a a bogale. Fa ba bone Jesu, lefa go ntse jalo, Badimone ba ba mo monneng ba goala kwa go Jesu, ba mmita Morwa Modimo, mme ba kopa kutlwelo-botlhoko. Re bala mo go Jakobe 2:19 gore badimo ba a “dumela”, ke go re, ba itse gore go na le Modimo wa boammaaruri o le mongwefela. Ga ba dumele mo tlhaloganyong ya go amogela Keresete, lefa e le ya go ikwatlhaela dibe tsa bone. Jesu o boditse leina la monna mme a amogela karabo, ebong “Mophato”. Modimone o ikutlwile a tlhomamisa gore o ne a tshwerwe ke dikete tsa mewa e e maswe e tshwana le mophato wa batlhabani. Mme Jesu a letla badimone go tsena mo dikolobeng tse di neng di fula gaufi. Eketse, se e ne e le tlhomamiso e monna o e tlhokileng, ka gonne morago ga se o ne a fola. Tota, o ne a eleditse go tsamaya le Jesu, mme Jesu o mo kopile go rerela batho ba gagabo pele. Se o se dirile mo Kgakgamalong ya bone.

JESU O NA LE NONOFO MO GODIMO GA BOLWETSE

Mareko 5:25-34

Nonofo ya ga Jesu mo godimo ga bolwetse e supilwe ke phodiso ya mosadi yo o neng a ama seaparo sa gagwe. Dilo di le dintsi tse di tlhokegang di ka lemogwa fa. Sa-ntlha, mosadi o ne a le mo seemong se se sa solofetseng Bolwetse jwa gagwe bo ne bo tshotse nako e telele – dingwaga di le lesome le-bobedi. O ne a sentse gotlhe mo o neng a na le gone go bona thuso. Boemong jwa go nna botoka o ne a lwalela pele. O ne a tlhoka thuso thata. Se se latelang, re bona tumelo ya gagwe o ne a tla fola fa fela a ne a ka ama seaparo sa ga Jesu fa a feta. Jalo re bona gore tumelo ya gagwe e ne ya siamisiwa. O ne a fodisiwa gotlhe-gotlhe ke Jesu jaaka a amile diaparo tsa gagwe. Jesu o ne a eletsa go bona yo o fodisitsweng ka tselo e, eseng go mo omanya, mme go mo segofatsa le go mo rotloetsa.

JESU O NA LE NONOFO MO GODIMO GA LOSO

Moreko 5:21-24 le 35-43

Se se ka bidiwa teko e kgolo ya nonofo ya ga Jesu. Nonofo ya gagwe mo godimo ga loso e supile gore kwa-ntle ga pelaelo e ne e le Modimo mo nameng o tshela mo gareng ga batho (Bala Johane 1:14). Mme a re lebeng pele monna yo ebong Jairo, yo o ne a tla go kopela morwadie thuso kwa go Jesu, morwadie yo o neng a lwala thata. O tsene mo matshwenyegong a matona go bonela mosetsanyana wa gagwe thuso, mme o ne a seka a swaba. Lwa-ntlha, re bona gore Jairo o lebetse maikgogomoso a gagwe. Ga go na pelaelo ya gore molaodi yo wa ntlo ya thuto o itsile kganetso ya baeteledipele ba tumelo mo tirong ya ga Jesu. Jaanong mo matshwenyegong a gagwe a magolo o lebetse maikgogomosa otlhe. Lefa go ntse jalo, maikgogomoso a rona a tshwanetse go nyelela fa pele ga Jesu Keresete. Se se latelang, re bona gore Jairo o lebetse boikgodiso jwa gagwe. Ene, molaodi wa ntlo ya thuto, o tsile mme a itatlhela fa dinaong tsa ga Jesu. Se se re gakolola ka polelo ya molaodi wa ntwala wa Siria, ebong Naamane (Bala 2 Dikgosi 5:1-14). Naamane o ne a tshwanelwa ke go ikokobetsa le go ikobela ditaello tsa ga Elisha. Fa a ikobile, o ne a fola.

Morwadia Jairo o ne a lwala thata mo barongwa ba tsileng ba tlisa dikgang tsa loso lwa mosetsanyana fa Jesu le Jairo ba ne ba santse ba le mo tseleng. Jesu o kgothatitse Jairo go tshegetsatsa tumelo e o setseng a e supile. Jesu o ne a ya kwa ntlong ya ga Jairo le barutwa ba le bararo ba o neng a ba rata thata. Koo re bona kgoberego e ka metlha e amanang le loso. Baledi le ditsala ba ne ba leba ka kgakgamalo kgorogo ya ga Jesu a na le Jairo. Kgakgamalo ya bone e ne ya fetoga

tshotlo fa Jesu a buile kaga mosetsanyana gore o robetse. Ditshego tsa bone di agelela tshupo e e fenyang ya loso lwa tota lwa ngwana. Tshotlo ya bone e ne ya fetoga kgakgamalo fa ngwana yo o suleng a ne a busediwa mo botshelong ke Jesu.

Nonofo ya ga Jesu e lekane go kgatlhantsha seemo sengwe le sengwe mo botshelong. Nonofo ya gagwe e kgona go go direla selo se se gaggamatsang thata mo botshelong. O ka itshwarela dibe tsa gago, o ka ntlafatsa botshelo jwa gago, mme o ka go fa botshelo jo bo-sakhutleng.

**TLHOMAMISA GORE O BADILE DITEMANA
TSE TSA BAEBELE**

Moreko 4:35 – 5:43

Mareko 1:22	Johane 1:14
Johane 1:3	2 Dikgosi 5:1-14
Jakobe 2:19	Baefesia 2:5

Thuto ya Bofera-bobedi
KERESETE O GANWA MO
MOTSENG WA GAGABO:
TIRO YA GAGWE E A GOLA

MAREKO 6:1-32

Temana ya Tlhogo:

Mme Jesu a ba raya a re, “Moporofeti ga a ke a tlhoka tlotlo, fa ese mo lefatsheng la gagabo, le mo losikeng lwa gagabo, le mo ntlong ya gagwe.” Moreko 6:4

KETAPELE

Mareko o bodela gore, morago ga go tsosa morwadia Jairo mo losong, Jesu o ne a “tla mo lefatsheng la gagabo,” eleng, kwa Galelea. Jesu o ne a dule mo lefelong la gagabo nako e telele jaanong mme tumo ya gagwe e ne e tsene kwa Jerusalema le mo mafelong a mangwe go ya kwa borwa. Go a supega, tumo ya gagwe e ne e ntse e buiwa le gone mo Nasaretha, ka gone fa a goroga teng matshwiti a batho ba boditse kaga motswedi wa bothale jwa gagwe le nonofo. Go ne go hutsafatsa gore bao ba o ne a kabo a ba rutila ka boitumelo le ka lorato ba ganne thuso ya gagwe. Mareko o re bolelela gore Jesu ka nost o ne a gakgametse gore go se dumele ga bone go ne go le go golo jalo.

O GANNWE MO NASARETHA *Mareko 6:1-6*

Go-boela ga ga Jesu kwa Nasaretha e ne e se loeto lwa tlwaelesego. O boetse kwa gagabo jaaka morena gongwe moruti le barutwa ba gagwe. Go ne go tlwaelesegile mo malatsing ao mo baruting go ya kwa le kwa ba ruta. Se se neng se gakgamatsa le go akabatsa batho ba Nasaretha e ne e le gore Jesu o ne a sa rutelwa mofuta o wa go ruta. Lefa go ntse jalo ba ne ba tshwanetse go dumela gore go ithuta gagwe mo go golo, bothale le taolo ya gagwe mo go ruteng le mo go rereng go feta ga baruti ba bangwe kgakala. Selo se sengwe se se neng se tshwentse batho ba Nasaretha e ne e le gore Jesu e ne e le motho yo ka metlha o dirang. Lefoko “mmetli” le raya “modiri ka diatla.” Modiri ka diatla e ne e le motho yo o neng a tlhalefile mo tirong ya dikgong mme a ka dira ditilo le eleng go aga ntlo. Ntlha ya gore o bidiwa “morwa Maria” e supa gore Josefa o ka ne a ne a sule. Gape fa Jesu a ne a le mo sefapaanong o kopile Johane go tlhokomela mmaagwe. Se, le sone, se supa gore Josefa o ne a sule.

Go bidiwa ga maina a bomonnawe Jesu ba basimane le bo-kgaitsadie fa le gone go re fa lesedinyana mo botshelong jwa gagwe jwa selegae. Jesu e ne e le Ene fela yo o kileng a tsalwa yo o neng a na le mmaagwe wa selefatshe le Rraagwe wa selegodimo. Maria le Josefa ba ne ba na le bana kafa thulaganyong ya tlhologo morago ga botsalo jwa ya Jesu (Mathaio 1:24-25). Ga go na bosupi mo Baebeleng go ganetsa boammaaruri jwa gore go ne go na le bana ba ba tsetsweng ke Maria le Josefa morago ga botsalo jwa kgakgamatso jwa ga Jesu.

Ntlha e tona fa, lefa go ntse jalo, ke go-se-dumele ga batho. Ka ntlha ya go-se-dumele ga bone, Jesu o ne a se kake a dira kgakgamatso epe e kgolo teng. Se se ka nna boammaaruri mo go rona gompieno. Re tshwanetse go dumela gore Jesu o na le nonofo ya go re boloka. Re tshwanetse go mo ineela, gongwe, le eleng gompieno, Jesu ga a kake a dira tiro epe e e thata mo dipelong tsa rona. Mme jalo Jesu a ba tlogela kwa Nasaretha. A re rapeleleng gore re seka ra mo leleka mo dipelong tsa rona ka go-se-dumele ga rona.

BA BA LESOME-LE-BOBEDI BA ROMELWA KWA NTLE

Mareko 6:7-13

Fa re bona lesedi la leano la bo-kamoso le Morena wa rona o tlaa bong a le dirisa fa a tlhomile phuthego O tlaabo a roma phuthego ya gagwe go ya go rera kwa dintlheng tsotlhe tsa lefatshe (Bona Mathaio 28:19-20). O rometse ba ba lesome-le-bobedi kwa ntle ka tiro e e tlhophegileng mo mogopolong wa gagwe. Ba tlisitse molaetsa wa Morena. Molaetsa oo o ne o tshwana le o o rerilweng pele ke Johane Mokolobetsi le ke Jesu ka sebele . . . “Ikwatlhayeng”. Go ikwatlhaya go raya go fetola kgopolo ya gago le go eletsa go tsenya ditiro tsa mongwe mo phetogong e ya kgopolo. Boikwatlhao bo thata, ka gonne bo utlwisa-botlhoko. Go raya go dumela phoso ya rona le go eletsa go dira sengwe ka yone. Bartutwa ba ne ba sa tlisa molaetsa wa Morena fela, mme gape ba ne ba tlisitse boutlwelo-botlhoko-jwa Morena. Ba tlisitse thuso le phodiso. Boikwatlhao jo ba bo rerileng bo gogetse kwa boitshwarelong le kwa polokong. Mo phodisong ya bone barutwa ba dirisitse leokwane. E ne e le molemo o o faphegileng wa bolwetse o o neng o itsege wa nako eo. Jesu o dirisitse dikalafi tsa bogologolo, mme o okeditse ka nonofo ya gagwe go tlisa nonofo e ntšha mo mokgweng o mogologolo. Le eleng jalo gompeino, Modimo o dirisa melemo ya seša mme o oketsa ka nonofo ya one. Modimo e santse e le ngaka e Kgolo e e dirang gompieno, mme phodiso yotlhe e tswa mo go one.

Selo se sengwe se re tshwanetseng go se akanya ke taelo e e neilweng ke Jesu mo go ba ba lesome-le-bobedi ba o ba romileng kwantle. Ba ne ba tshwanetse go tsamaya ba apere fela, ba sa kgaba, ba sa tseye mefago, le go amogela kamogelo e ba tla e newang. Mokgwa o o ne o tla supa gore ba ne ba sa tshwane le Bafarasai ba ba ne ba rata go apara go itshupa. Go ne go tla supa gore ba ikaegile mo Modimong go ba babalela. Go ne go tla supa gore ba ne ba rata go amogela le go amogelwa ke batho fela.

LOSO LWA GA JOHANE MOKOLOBETSI *Moreko 6:14-29*

Katlego ya go rera le go fodisa ga barutwa e tsile mo temogong ya ga Herode Antipase, molaodi wa Galelea. Ka go utlwa dikgagamatso le thero, Herode o ne a dumela gore Johane Mokolobetsi, yo o mmolaileng, o tshela gape. Ka go umakwa ga ga Johane Mokolobetsi, Mareko o re bolelela dilo dingwe tsa botlalo tsa loso lwa ga Johane Mokolobetsi.

Herode Antipase o ne a etetse monnawe wa monna, ebong Herode Filipino, mo Roma, kwa o neng a tlhotlheletsa Herodiase, mosadi wa go Filipino, go boela le ene kwa Palesetine. O ne a tlhadile mosadi wa gagwe ka nako eo. Se e ne e le thulaganyo e e bolelo, e tlola yoo-mebedi melao ya Sejuda le ya Seroma, mme mo godimo ga tsotlhe, molao wa Modimo. Johane Mokolobetsi o buetse kwa-ntle kgatlhanong le sebe se se mo Phatlalatseng se mme a kopana le kgakalo ya ga Herodiase. Herode o ne a tshwara Johane, mme ka ntlha ya go boifa batho o ne a itumelela go mo lesa mo kgolegelong. Herode ebile o ne a rata thero ya ga Johane mme mo pelong ya gagwe o itsile gore sotlhe se Johane o se buileng se boammaaruri. Ka ntlha ya ga Herodiase, Herode o ne a baya Johane a lotleletse mo kgolegelong. Herodiase, a letile nako ya gagwe (temana 21), o ne a dira leano. Kwa moletlong wa go tlotla botsalo jwa ga Herode, morwadia Herodiase o ne a binela baeng. Herode o ne a itumetse mo o ne a solofetsa go diragatsa kopu ya gagwe go ya go fitlha kwa bontlheng-nngwe jwa bogosi jwa gagwe. Ka go laelwa ke mmaagwe, mosetsana a kopa tlhogo ya ga Johane Mokolobetsi go tlisiwa ka mogopo. Herode ka bonako a ikwatlhaela tsholofetso ya boeleele e o e dirileng. Lefa go ntse jalo, ka ntlha ya ikano ya gagwe fa pele ga baeng ba gagwe, o ne a mo e neela. Mme jalo Johane Mokolobetsi o ne a kgaolwa tlhogo mo kgolegelong. Fa barutwa ba ga Johane ba utlwa ka loso lwa gagwe ba ne ba tla go tsaya mmele wa gagwe mme ba o fitlha. Moetapele wa ga Jesu o ne a diragaditse tiro ya gagwe. O ne a boletse go-tla ga Jesu, mme jaanong o ne a fetile mo ponalong.

Herode o gopotse gore Jesu e ne e le Johane a tsogile mo baswing. Ba bangwe ba gopotse gore e ne e le moporofeti jaaka baporofeti ba Kgolagano E Kgologolo. Dikakanyo tsoo-pedi di ne di le phoso. O ne a feta moo. E ne e le Modimo o senotswe mo nameng ya motho. E ne e le Modimo o etetse batho go tliša poloko mo go bone.

Gape mo polelong e re bona mekgwa ya bo Herode le Herodiase le morwadia Herodiase e senoga. Herode o ne a ila Johane gape a mo rata. O ne a ilela Johane mafoko a gagwe, mme o ne a ratela Johane bopelokgale le boammaaruri jwa gagwe. Mme fa teko e tsile, o paletswe ke go sireletsa Johane. Bangwe gompieno ba tshwana le Herode, ba ba tla letlelelang Satane go ba laola fa nako ya teko e tla. Herodiase e ne e le mosadi yo o boikepo yo o neng a letile lobaka lwa gagwe lwa go senya Johane. O ne a se ketla a tshwanela go kopane le Johane gape, mme o lebetse kaga katlholo ya Modimo. Morwadia Herodiase e ne e le mopati mo tirong e e bosula. O binne mebino ya sebe ya letsatsi leo mme jaanong a dirisa botsalano jwa gagwe le Herode go lopa tlhogo ya moporofeti wa Modimo.

BARUTWA BA A BOA *Mareko 6:30-32*

Fa barutwa ba boile mme ba boletse Jesu tsotlhe tse di diragetseng, o ne a ba tseela kwa thoko ka nakonyana go itapolosa. Barutwa ba ne ba diretse batho. Jaanong ba ne ba tlhoka nako ya go nna le Jesu.

**TLHOMAMISA GORE O BADILE DITEMANA
TSE TSA BAEBELE
Mareko 6:1-32
Mathaio 1:24-25 Mathaio 28:19-20**

Thuto ya bofera-bongwe
**KGATELELO YA GA JESU MO
GODIMO GA MELAO YA
TLHOLEGO**

MAREKO 6:33-56

Temana ya Tlhogo:

Gonne ba mmona botlhe, mme ba fuduega. Mme a akofa a bua nabo a re, "Nametsegang, Ke nna; se boifeng." Mareko 6:50

KETAPELE

Fa barutwa ba boa kwa tirong ya bone, ba boleletse Jesu tsotlhe tse ba di dirileng. Bontsi jwa batho ba ba neng ba kopa thuso ba ne ba ganelela mo barutweng mo barutwa ba ne ba sena nako ya go ja. Jesu o ba boleletse go tla le ene kwa lefelong le le didimetseng kwa ntlheng e nngwe ya letšha gore ba tle ba nne le kagiso le go itapolosa. Fa, re bona tsela ya botshelo jwa Sekeresete. Botshelo jwa Sekeresete ke loeto lo lo tswelletseng fa pele ga Modimo go kopa nonofo ya go kgatlhantsha matshwenyego le mathata a re kopangwang le one letsatsi le letsatsi. Re tlhoka go nna le nako fa pele ga Modimo malatsi otlhe gore o tlatse matshelo a rona go lebagana le sengwe le sengwe se se ka tlang.

Mo ditemaneng tse di setseng tsa kgaolo e, re bona ditiragalo di le tharo tse Mareko o di kwadileng go re fa tshedimosetso e e tswelletseng mo tirong ya ga Jesu. Ditiragalo tse ga di senole nonofo ya ga Jesu fela, mme le lorato le kutlwelo-botlhoko.

DIKETE TSE TLHANO DI A FEPIWA Mareko 6:33-44

Bontsi jwa batho bo lebeletse mokoro o Jesu le barutwa ba gagwe ba ne ba tsamaya ka one gore ba tle ba ba kgatlhantshe kwa lotshitshing lo longwe. Mo boemong jwa go gakalela bontsi jwa batho jo bo ne bo se kake jwa ba tlogela ba le bosii, Jesu o ne a nna le Kutlwelo-botlhoko le lorato mo go bone. Mogopolo o gakologetswe ka bonako setshwantsho sa dinku tse di latlhegileng di kgarakgatshega di sena modisa. Jesu, Modisa yo mogolo wa dinku, o gopotse se o ka se ba direlang. Mme jalo, kwa-ntle ga ketsaetsego, Jesu o ne a simolola go ba ruta gape. Lorato lwa ga Jesu lo tswelela go supiwa mo go fepeng bontsi jwa batho ga gagwe. Barutwa ba batlile go leleka batho. Ba ngongoregetse gore go tla tsaya madi a mantši go rekela

bontsi jwa batho dijo. “Denariuse” (lefoko le le ka phuthololwang jaaka Sente/Thebe) gongwe “dolara” go ya ka phetolelo ya Baebele e o e balang) e ne e tuelo e e tlhomameng ya tiro ya letsatsi le le lengwefela. Barutwa ba ne ba re, “Go ka tsaya motho dikgwedi di le borobabobedi go amogela mo go lekaneng go fa bontsi jo dijo tsa nako e le nngwefela.” Mme barutwa ba ne ba lebetse gape nonofo ya ga Jesu. Ka go tsaya dijo tsa motshegare tsa mosimanyana, Jesu o ne a fepa bontsi jwa batho.

Thuto mo go Rona

Tiragalo e e re supetsa ditiragalo tse pedi mo letlhokong la setho. Barutwa ba ne ba re, “Batho ba ba lapile mme ba tshwerwe ke tlala; ba romele kwa magaeng.” Jesu o bone bone batho ba ba lapileng mme ba tshwerwe ke tlala, mme o ne a re, “Batho ba ba lapile mme ba tshwerwe ke tlalaa; re tshwanetse go dira sengwe ka gone.” Re bona gape fa ditiragalo tse pedi mo metsweding ya setho. Barutwa ba ne ba re, “Sengwe le sengwe se re ka se direlang batho ba gase kake sa lekana.” Dinkgwe tse di ne di sa tshwane le dinkgwe tsa rona tsa gompieno. Di ne di tshwana le dinkgwe tse di golokilweng tsa rona. Ditlhapi e ne e le tlhapi e e letswai e jewa jaaka sešabo le dinkgwe tse di golokilweng. Mme Jesu o fepile batho ba ba dikete di le tlhano ka tsone. A re gakologelweng gore se le sennye sa rona se neilwe Modimo se ka dirisiwa ke ene mme sa ntsifadiwa gantsi mo godimo. Dineo tsa rona di ka dirisiwa ke Modimo mme tsa diriwa go segofatsa batho ba le bantsi. A re ipotseng gore re ka direla ba bangwe eng ka go ineela mo go Morena Jesu Keresete.

PHENYO MO GODIMO GA SEFEFO *Mareko 6:45-52*

Morago ga matshwiti a batho a fepilwe, Jesu o ne a romela barutwa go tsamaya ka mokoro. Mareko ga a re bolelele gore ke ka ntlha ya’ng fa Jesu a ne a tsamaisa barutwa pele ga a tsamaisa batho. Johane o re bolelela gore bontsi jwa batho bo lekile go dira Jesu Kgosi. (Johane 6:15) Bontsi jwa batho bo gopotse gore o ne a tla nna kgosi e e gakgamatsang jang. E ne e le yo o tla tsosang baswi, a fodisa ba ba golafetseng, le go fa batlhabani dijo ba ba neng ba tla gapa lefatshe. Batho ba ne ba na le kakanyo e e nonofileng thata ya mofuta wa polotiki ya mesia (Mmoloki), mo Jesu o batlileng nako e ntsi go ba ruta gore o ne a tletse eng. Jalo Jesu o ne a tsamaisa barutwa go ba letla go nna le boitapoloso. Jalo o ne a phatlalatsa bontsi jwa batho mme a ya kwa thabeng go rapela. E ka nna ka nako ya 3 maphakela Jesu o ne a tla kwa barutweng a tsamaya fa godimo ga metsi. Nako

nngwe le nngwe e barutwa ba mmatlileng ka yone, Jesu o ne a le teng. O tlogetse nako ya gagwe ya go rapela le matshwenyego otlhe a a mo gateletseng go ya kwa go bao ba ba mo letlhokong. Kgakgamatso ke e e e bonalang e sena thanolo ya semowa go fitlhelela re e leba ka kelotlhoko. E ne e le, pele ga tsotlhe, karabo ya tlholego ya ga Jesu mo letlhokong la motho. E ne e le gape lobaka lo longwe go ruta barutwa thuto e e tlhokegang-thata. Fa dilo di ne di lebeга maswe, barutwa ka go se-fetogeng ba latlhe bopelokgale jwa bone le tumelo ya bone. Se se ne se se kake sa direga. Jesu o ne a ya go ba tlhomamisetsa gape. Tsotlhe ka bonako-nako diphefo tsa pogiso tse di boitshegang go feta phefo ya lewatle di ne di tla ba tsoгela. Ba tshwanetse go tlhomamisa gore Jesu o ne a kgona go ba thusa go tlhabantsha ntwа nngwe le nngwe. Boammaaruri jwa gore barutwa ba ne ba sa ithuta selo se sentle bo supiwa ke polelo ya ga Mareko, “gonne ba seka ba tlhologanya kaga dinkgwe, le dipelo tsa bone di ne di kgwaraletse” (temana 52).

MAFOKO A GA JESU MO GO RONA

Akanya mafoko, “Ke nna; se boifeng” a a builweng ke Jesu mo barutweng ba ba mo bothateng a tshwanetse a bo a ne a raya eng mo go bone. Foo mo bogareng jwa lewatle, ka bodiphatsa jwa go nyelela mo dikgopolong tsa bone, Jesu ka sebele o tsile kwa go bone mme o buile kagiso mo go bone. Ga re bolelelwe gore ke ka ntlha ya’ng ba ne ba sa mo itse, mme gongwe ke ka ntlha ya gore ba ne ba sa mo solofela. Gongwe pula e e tswang mo phefong e kgoreditse pono ya bone. Lefa go ntse jalo, fa a gorogile kwa mokorong mme a tsene mo go one, phefo e ne ya ema mme lewatle la didimala. Boleyong jwa ga Jesu ka metlha bo tlisa kagiso le tidimalo. Mo bakereseteng ba pele, go sotlegela pogiso ka ntlha tsotlhe, mafoko a a ga Jesu a tshwanetse a bo a tlisitse kagiso mo go bone fa ba badile mafoko a ga Jesu, “Nametsegang, Ke nna, se boifeng.”

MO GENESERETA *Mareko 6:53-56*

Mo ntlheng e nngwe ya letšha la Galelea bontsi jwa batho bo simolotse go kokoana fela ka bonako fa ba lemogile Jesu. Go-goroga ga gagwe mo lefelong lengwe le lengwe e ne e le mafoko a a molemo mo balwetseng le mo digoleng. Se e ne e le nako ya go itsege mo go golo ga ga Jesu; gongwe le gongwe kwa o go ileng bontsi jwa batho bo kokoane go mo utlwa. Ba ba lwalang ba ne ba tlisiwa kwa go Jesu, mme mongwe le mongwe yo o mo amileng o ne a fodisiwa. Selo se se utlwisang-botlhoko e ne e le gore batho ba ba ne ba tletse fela se ba ka

se bonang mo go Jesu. Fa Jesu a tlhokile boikanyego jwa bone ka nako ya pogiso, ba ne ba simolola go tsamaya. Jesu o boditse barutwa fa le bone ba tla mo tlogela ba tsamaya (Bala Johane 6:66-67).

Ka bofutsana, go boammaaruri mo bathong ba le bantsi gompieno. Ba tla kwa go Jesu le kwa kerekeng go ipatlela sengwe. Ga batle go intshetsa Keresete. Jalo bontsi bo botsa gore, “Kereke e ka ntirela eng?” A mongwe le mongwe wa rona a ikaelele gore re tla direla le go thusa ba bangwe, mme eseng fela go batla dilo dingwe gape ka bopelotshetlha.

**TLHOMAMISA GORE O BADILE DITEMANA
TSE TSA BAEBELE**

Mareko 6:33-56

Johane 6:15

Johane 6:66-67

Thuto ya Lesome
BODIPHATSA JWA TUMELO E E
DIRILWENG KE MOTHO

MAREKO 7:1-23

Temana ya Tlhogo:

Ga go na sepe se se kwa ntle ga motho se e ka reng se tsena mo go ene sa mo itshekolola; mme dilo tse di tswang mo mothong ke tsone tse di itshekololang motho. Mareko 7:15

KATAPELE

Mo kgaolong ya bosupa re bona kganetso e ntsi kgalhanong le Jesu. Pele ga bontsi jo jwa baeteledipele le balaodi ba ntlo ba tsogile kgalhanong le Jesu, ditlhopho tsa Bafarasai le Baherodia ba ne ba ganne dithuto tsa gagwe, Jaanong lefa go ntse jalo, Jesu o ne a tlelwa ke setlhopho sa bakwadi le Bafarasai ba romilwe go tswa Jerusalema go tla go mmotsa ba lebagane nae kaga dilo dingwe. Kutlwisobotlhoko e ne e le gore batho ba ba ne ba tsile fela go baya Jesu molato le go mo nyennyafatsa. Fa ba ne ba tsile ka kgopolo e e bulegileng, ba eletsa go rutwa, ba kabo ba tsamaile ka phetogo e kgolo mo dipelong tsa bone.

Wena, moithuti yo o rategang, tla mo Baebeleng ka mogopolo o o bulegileng, o ipaakanyeditse boammaaruri jo Modimo o go bo beetseng.

BOPHEPA LE LESWE Mareko 7:1-4

Fa Jesu o ne a lebagane le ikaelelo e kgolo thata e o e bewang pele e tswa mo Bafarasaing le mo bakwading. Jesu le barutwa ba gagwe ba ne ba bewa melato ya kgolagano e kgologolo le go tlola melao gongwe mekgwa ya baeteledipele. Melao e e Lesome gape e raya le dikwalo tse tlhano tsa ntlha tsa Kgolagano e kgologolo, tse di bidiwang dikwalo tsa molao. Fa bakwadi le Bafarasai ba beile Jesu le barutwa ba gagwe molato, wa go tlola mekgwa ya bagologolo, ba ne ba raya ditlhaloso tsa batho tsa kgolagano e kgologolo. Se se tlhalosa sesupo sa go tlhapa diatla. Mokgwa wa bagologolo o ne o gatelela gore Bajuda ba tlhape diatla tsa bone gantsi eseng fela ka ntlha ya tiro ya botshelo jo bophepa le ka bophepa jwa mmele, mme gape ele morago ga kamamo nngwe le nngwe le motho yo e ne e se Mojuda.

Mokgwa e ne e le teko ya go dirisa batho botlhe molao o o neng o filwe baperesiti kwa tshimologong fa ba tshwara dijo tse di boitshepo.

Bakwadi le Bafarasai ba ne ba sa amege gotlhe – gotlhe kaga gore a diatla tsa barutwa di ne di le phepa gongwe di le leswe, mme fela gore a di ne di tlhapisitswe ka mokgwa mongwe. Mokgwa o o ne o bolela gore go ne go tshwanetse go dirisiwa metsi a le kae, gore diatla di ne di tshwanetse go tshwarwa jang, jalo, jalo. Motho gongwe selo se ne se ka nna sa leswefala ka ditsela di le dintsi. Sekai, kapetla e e khuti ya letsopa e ne e ka nna leswe kafa ntle. Kapetla ya letlalo e e sepapetla e ne e se kake ya nna leswe, mme kapetla ya letlalo e e khuti e ne e ka nna leswe kafa teng gongwe kafa ntle. Go ne go na le dikete tsa melao e mengwe e e ne e dirilwe ke bakwadi, ba ba neng ba ithomile jaaka balaodi mo dilong tsothle tsa thanolo tse di lebaganeng le melao ya Sejuda le mekgwa.

KARABO YA GO JESU *Mareko 7:5-8*

Bafarasai le Bakwadi ba ne ba tsile go lalela Jesu le barutwa ba gagwe mo tlong ya melao e. Ba ne ba sa tla go leka go bona se Jesu o neng a se ruta mabapi le tumelo mo Modimong.

Ba ne ba sa kgatlhwe ke dikgakgamatso tse o neng a di dira. Ba ne ba sena sepe le batho ba Jesu o neng a ba fodisa le go ba thusa. Ba ne ba lebagane fela le ntlha ya gore Jesu le barutwa ba gagwe ba ne ba tlodile molao wa setso. Ao !Bofofu jwa batho! Mme go santse go na le bao gompiano ba ba santseng ba gatelela mo go lekeng go tshela ka lokwalo lwa molao, mo ba se kakeng ba go dira, mme ba lebala tsamaiso ya metheo ya molao. Melao ya ditlhabelo e e mo kgolaganong e kgologolo e diragaditswe mme jalo e feditse. Jesu e ne e le setlhabelo se se itshekileng, Kwana ya Modimo, e ditlhabelo tsothle tsa kgolaganong e kgologolo di e supileng. Fela jalo, ditirelo tse dingwe le melao ya ditso di tlogetswe. A re se lebaleng gore Jesu e ne e le Modimo, mme jalo e ne e le Modiri wa melao yotlhe ya tshiamo. Tlhaloso ya ya gagwe mo go se tota molao wa tshiamo o ne o se raya e ne e tshwanetse go imela tlhaloso nngwe le nngwe ya motho. Mo karabong ya ga Jesu, o beile Bafarasai le bakwadi molato wa dilo di le pedi lwa – ntlha o rile e ne e le baitimokanyi. Lefoko le le rayamotho yo o tshamekang gongwe mongwe yo o tshamekang karolo nngwe. Batho ba ne ba leka go dira dilo ka bo- kafa ntle mme ba sa tlhokomele sepe kaga mekgwa ya bo kafa teng le dibe tse di fitlhlweng teng. Jesu o badile mo go Isia 29:13 go supetsa batho se tota ba neng ba se dira. Ba ne ba tlhokomologa ditaolo tsa Modimo fa ka kelotlhoko ba ne ba latela ditaolo tsa batho. Iwa – boabedi, Jesu o ba beile molato wa go emisetsa melao ya Modimo ka ditsamaiso tsa batho. Tumelo ya nnete ga e kake ya tsalwa ke batho. E tshwanetse go tswa kwa Modimong ka metlha.

MEKGWA YA BATHO KGATLHANONG LE MELAO YA MODIMO *Mareko 7:9-13*

Jesu o dirisitse mafoko a a nonofileng mo temaneng ya bo 9 fa a rile, lo itse sentle go dirölola taolo ya Modimo gore lo tle lo tshagetse ngwao ya lona “(phuthololo e dirilwe ke William Barclay).

Mme jalo o ne a fa sekai sa selo sone se. Moshe o laotse tlotlo mo batsading, mme ngwao e letleletse dithoto go bidiwa” Korebana”, ke gore, “Se se abetsweng Modimo” kafa tlase ga ikano. Ikano mo tshimologong e ne e raya gore karolo gongwe khumo yotlhe ya motho e ne e tlhomamiseditswe Modimo mme e ne e tshwanetse go neelwa tempele. Lefa go ntse jalo, batho ba ne ba simolotse go e dirisa ka tsela ya go falola ditshwanelo tsa bone mo batsading. Ba ne ba bitsa dithoto tsa bone korebana, mme ba sena maikaelelo a go di fa tiro ya Modimo. Ka tsela e ba ne ba tshela ka mekgwa ya bagologolo, mme ba roba ditaolo tsa Modimo.

ITSHEKOLOGO YA NNETE *Mareko 7:14-23*

Kgaolo e, fa e ne e buiwa, e ka ne e ne e le ka bojotlhe kgaolo e e borukuthi thata kgatlhanong le kgolagano e Ntšha. Jesu o tlhalositse pharologanyo fa gare ga tumelo ya Sejuda le tumelo e o neng a tsile go e tlhoma. Mo Bafarasaing, tumelo e ne e le setshwantsho sa bokafa – ntle mo melaong le mo ditsamaisong. Mo balateding ba ga Jesu, tumelo ke kitso ya bokafa-teng ya tshegofatso ya Modimo. Tsela e ya tshegofatso e ne ya senolwa ke Jesu mme e tla ka ene. Fa mo polelong e kgolo e, Jesu o phimotse ditumelo tse di itiretsweng ke batho. O boletse gore itshekologo ya nnete ke maungo a pelo e e leswe. Se se ka fetolwa fela ke itemogelo ya boikwatlhao le tumelo e e dirafalang mo botsalong jo boša, Bona & 2 Bakorintha 5:17 le Johane 3:3.

DITHUTO DINGWE TSA GO DI GAKOLOGELWA

Dinnete tse dikgolo tse di tla mo go rona di tswa mo kgaolong e

1. Botshelo jwa tumelo jwa Mokeresete bo tshwanetse go tswa itemogelong ya sebele e e boammaaruri ya tshegofatso mo pelong.
2. Boammaaruri jwa tumelo bo tshwanetse go lekwa, eseng ka ditumelano tsa ditiro tsa tumelo mme e leng ka ditumelano tsa maikaelelo a Mokeresete. Bokeresete ga se selo sa go ja gongwe go sa je dijo dingwe. Mmele wa rona ke tempele ya Modimo, mme jalo o tshwanetse go dirisiwa ka tsela e e tlišang tlotlo mo Modimong.

3. Taolo ya bofelo mo ngwaneng wa Modimo mo dilong tsa Modimo le tiro, ke lefoko la Modimo, ebong Baebile. Mafoko a batho a tshwanetse go akanyediwa mo leseding la se Baebile e se rutang.

**TLHOMAMISA GORE O BADILE DITEMANA
TSE TSA BAEBELE**

Mareko 7:1-23 Isaia 28:13
2 Bakorintha 5:17 Johane 3:3

Thuto ya lesome – le bongwe
TSWELELO YA
DIKGAKGAMATSO DINGWE

Mareko 7:24 – 8 – 26

Temana ya Tlhogo:

Mme ba gakgamala mo go feteletseng, bare,” O dirile dilo tsothe sentle; o dira gore ba ba bosusu ba utlwe, le ba ba dimumu gore ba bue” Mareko 7:37.

KETAPELE:

Go itsege ga ga Jesu mo bontsing jwa batho le kganetso ya Bafarasai di ne tsa dira gore Jesu a tswe gape mo Galilea, nako e o ne a ya mo lefatsheng la Fonesia, le e ne e le lefatshhe la Baditshaba. Banni ba Fonesia e ne e le dikokomana tsa Ba-Kanana ba bogologolo. Metse e mebedi ya botlhokwa mo kgaolong e, e ne e le ditshitshi tsa lewatle, e le magorogelo a dikepe, a Ture le Sidona. Ture o ka ne a le dikilometara dile 65 kwa bokone Bophirima jwa Kaperenaume. Leina la one le raya “Lefika”. O biditswe jalo ka gone kwa ntle ga lotshitshi go ne go na le maje a matona a mabedi a tshwaragantswe ke lekhubu le le bolelele jwa dimetara di le 900. Lekhubu le ne le dira thubego ya metsi ka tlholego, mme Ture e ne e le bogorogelo jwa dikepe jo bo tumileng. E ne e le go tswa mo Ture le Sidona mo bakgweetsi ba ntlha ba dikepe ba ithutileng teng go kgweetsa dikepe ka go lepa dinaledi. Sidona o bokgakala jwa dikilometara dile 100 kwa bokone jwa Kaperenaume mme le ene e ne e le motse wa botlhokwa wa dikepe ka nako ya one.

BATHO BOTLHE BA A TSHWANA MO GO JESU

Mareko 7:24-30

Re akanye pele ka ga tiragalo e e amang le go sa lebaesege e e diragetseng fa, mo lefatsheng le la Baditshaba. Jesu o ne a santse a tswa go phimola dipharologanyo fa gare ga dijo tse di phepa le tse di leswe. Jaanong o tlosa dipharologanyo fa gare ga batho ba ba neng ba bidiwa ba ba “itshekileng” le ba ba itshekologileng. Bajuda ba ne ba sena ditirisano le batho ba eneng e se ba lotso lwa bone fa ese ka ditsela dingwe tse kwa morago di neng di biletsa kwa medirong ya itshekiso. Mosadi wa Serofonika o ne a tla a kopela ngwana wa gagwe yo o neng a lwala thuso. Karabo ya ga Jesu e lebege e le bogale fa a ne a mo raya le batho ba gagabo are “dintša” lefa go ntse jalo, Jesu o ne

a tsaya lefoko le le ne le dirisiwa ka tlhaloganyo e e maswe ke Bajuda ka ga Baditshaba mme a le fetolela mo lefokong la tsholofelo. Lefoko le le dirisiwa ka tlhaloganyo e e maswe ke Bajuda ka ga Baditshaba mme a le fetolela mo lefokong la tsholofelo. Lefoko le le dirisitsweng ke Jesu le raya gore, “dintšanyana tse di ruilweng,” e seng dintša tse di nyadiwang tsa tsela. Karabo ya gagwe e supile tumelo ya gagwe le boikokobetso jwa gagwe mo go Jesu. Tiro ya ga Jesu e buetse kwa godimo mo go rona go feta mafoko. O fodisitse mosetsana wa Moditshaba.

JESU O BUSETSA PUO LE KUTLO

Mareko 7:34-37

Ga go na kgakgamatso e e supang go feta e nngwe ka bontle, tsela ya ga Jesu ya go tshwara batho. O ne a sa akanyetse monna gore ke motho fela yo o lwalang, mme o ne a mo tshwara jaaka motho ka sebele yo o nang le lethoko la gagwe le le faphegileng. Lwa-ntlha, o ne a tseela monna kwa- thoko. bosusu le bomumu ke dipogisego tse di tshwenyang.

Jesu o ne a tseela monna kwa- thoko mme a dirisana le ene a le nosi. Gape re bona tsela e Jesu o fodisitseng monna ka yone. Ka ntlha ya gore monna o ne a se kake a utlwa gongwe go bua, Jesu o dirisitse dikai go mo supetsa se o neng a tloga a se diri. Go tsenya menwana ya gagwe mo tsebeng tsa monna, go tshwara loleme lwa gagwe, le ka go leba kwa legodimong go buile molaetsa o o didimetseng mo monneng. Kakgelo ya batho mabapi le phodiso e ne e le gore Jesu o dirile dilo tsotlhe sentle. Se se re gakolola lefoko la Modimo mo go Genesis 1:31 fa lobopo lwa Modimo lo buiwa lo le molemo thata. Fa Jesu a tsile, go tliša phodiso mo mebeleng ya batho le poloko mo meweng ya bone, O ne a simolotse tiro ya lobopo seša. Sebe se ne se onaditse, se sentse lobopo lwa Modimo lwa pele. Jaanong Modimo mo go Keresete o ne o bopa motho seša.

GO FEPA DIKETE TSE NNE

Mareko 8:1-10

Mo boemong jwa taolo ya ga Jesu ya gore kgakgamatso ya gagwe ya go fodisa susu le semumu e seka ya bolelwa, lefoko le ne la anama thata mo ebileng batho ba le dikete di le nne ba ne ba phuthegela go mo utlwa. Ka malatsi a le maroro ba reeditse dithuto tsa gagwe. Jaanong ka ntlha ya lorato lwa gagwe Jesu o ne a ikaelela go ba fepa (Bona ditemana 2 le 3). Gangwe le gape, Jesu o ne a tsaya dijo tse di

neng di sekae tse di tlisitsweng kwa go ene a di ntsifatsa go fepa matshutitshuti a batho.

Go-fepa mo nako nngwe go ntse go thakatlanngwa le go-fepa ga dikete tse tlhano mo go kwadilweng pele mo kgaolong ta bo 6 ya ga Mareko. Lefa go ntse jalo, Kafa mafokong a ga Jesu ka sebele mo go Mareko 8:19-20, ke dikgakgamatso tse pedi tse di farologaneng. Mo bontsing jwa batho, e ne e le dikgakgamatso tsa lorato le nonofo. Mo barutweng ba ba lesome le bobedi, e ne e le dikgakgamatso le ditaelo.

BAFARASAI BA BATLA SESUPO *Mareko 8:11-13*

Morago ga go fepa bontsi jwa batho, Jesu le barutwa ba gagwe ba kgabagantse karolo ya lewatle go ya kwa kgaolong e nngwe. Fa, ba kopane le sethlopha sa bafarasai ba batla sesupo mo go ene. Selo se se gagkamatsang e ne ele gore ba ne ba bone dikgakgamatso tse dintsi-ntsi tse Jesu o di dirileng mme ba ne ba santse ba ipatlela e nngwe. Go lebega ka gore se ba neng ba se batla e ne e le setshwantsho sengwe se se sa tlwaelesegang go kgabaganya magodimo se se tla kgatlhisang kelotlhoko ka bophara. Se, le sone, e ne e le karolo ya dikakanyo tsa bone ya go-tla ga Mesia yo o neng a tla etelelepele jaaka Kgosi le mmusi wa selefatshe. Le eleng gompieno go na le ba le bantsi ba ba ganang go ithuta kaga Modimo. Ba na le bosupi jwa lefatshe le le tlhodilweng mo tikologong ya bone, boammaaruri jobo mo Baebeleng le bosupi jwa Mowa OO Boitshepo. Jesu o ganne go ba fa sesupo se se fapegileng ka ntlha ya gore o itsile gore ba ne ba sa batle boammaaruri ka bopelo-ephepa. O ba batlile gore ba dumele ka ntlha ya dithuto tsa gagwe le ditiro tsa gagwe tse di fa pele ga bone letsatsi le letsatsi. Baeteledi-pele ba tumelo ba ne ba solofetse Mesia yo o ne a tla tlhoma bogosi jwa Iseraela, a leleka babusi ba Maroma, le go dira dikgakgamatso go kgatlha bontsi jwa batho. Jesu o gateletse gore o ne a tsile go batla le go boloka ba ba latlhegileng le go ntsha botshelo jwa gagwe go nna thekolo mo bontsing mo jwa batho (Mathaio 20:14-28)

BARUTWA BA BONYA GO ITHUTA

Mareko 8:14-28

E rile Jesu le Barutwa ba gagwe ba tshela Lewatle la Galilea gape o bulie le bone tlhagiso kaga Bafarasai. Jesu o file setshwantsho sa sebediso sa senkgwe, mme barutwa ba seka ba tlhaloganya. O ne a ba kgalemelela go nna bonya mo go kalo tlhaloganya thanolo ya dikgakgamatso tse pedi tsa go fepa matshutitshuti a batho. Jesu o ne a bolela barutwa ba gagwe gore go ja senkgwe go otlala mmele ga go gaufi

le go tlhokega ga go amogela dijo tsa mowa go nna le botshelo jo bosakhutleng.

MONNA WA SEFOFU KWA BETHESAIDA

Mareko 8:22-26

Fa a goroga kwa Bethesaida, Jesu o ne a kgatlhantshiwa ke setlhopho sa batho ba tlisitse monna yo o sefofu kwa go ene. Jaaka mo tiragalong ya monna wa susu, Jesu o dirisitse tsela e e sa tlwaelesegang ya phodiso. O ne a tseela kwa-thoko, mmeka go dirisa mathe, o ne a tshasa matlho a monna. Tiriso ya mathe, e ne tsena e na le dinonofo tsa phodiso mo malatsing ao, le phodiso e e bonya e ne e le dithuso tse di diritsweng ke Jesu go nonotsha tumelo ya monna. Le eleng jalo gompieno, Jesu o dira le rona kafa letlhokong la rona le kafa ditiragalong tsa rona. A re akanyeng puo nngwe e e dirilweng ke monna mo nakong ya phodiso. Monna o rile, “Ke bona batho ekete ditlhare, ba a tsamaya. “Ke gore, monna o bone dilo, mme di ne sa tlhalosege sentle. Batho ba ne ba lebega mo go ene jaaka ditlhare di na le dikala tse di tswang mo go tsone. Mo lefatsheng la rona gompieno go na le batho ba le bantsi ba ba folang bontlha bongwe ka go amana le Jesu.

Ba santse ba bona batho jaaka dilo tse di tshwanang le ditlhare, mme eseng jaaka mewa e e tshelang e e tlhotlha e fetang khumo yotlhe ya lefatshe.

Ao ekete re ka bona tlhotlha ya boammaaruri jwa botho ponong ya Modimo! A thapelo ya rona enne gore re seka ra bona batho jaaka ditlhare tse di tsamayang, mme re ba bone jaaka Jesu a ba bona, jaaka mewa e e rategang e Jesu o e swetseng mo sefapaanong.

TLAHOMAMISA GORE O BADILE DITEMANA

TSE TSA BAEBELE

Mareko 7:24, 8:26

Genesis 1:31

Mathaio 20:28

Thuto ya Lesome le Bobedi
THANOLO YA TIRO YA GA JESU
MAREKO 8:27-38

Temana ya tlhogo:

Gonne motho o thusiwa eng fa a fenyha lefatshe lotlhe mme a latlha botshelo jwa gagwe? Mareko 8:36

KETAPELE

Jesu o ne a ntse nako e telele le barutwa. Ba ne ba bone dikgakgamatso tsa gagwe le dithuto tsa gagwe. Jaanong go ne go tlhokega thata gore a itse sentle gore ba ne ba gopola eng ka ene le tiro ya gagwe mo lefatsheng. Ka mantswe a mangwe, Jesu o batlile go itse fa barutwa ba itsile thanolo ya tiro ya gagwe. Kganetso ya bakwadi le Bafarasai e ne e tla tloga e tswela kwa-ntle mme e rulaganye ditswe kilo. Jesu o ne a batla go tlhomamisa tumelo ya barutwa mo go ene jaaka Morena LE Mmoloki.

BOIPOLELO JO BOGOLO *Mareko 8:27-30*

Lwa-bofelo o ne a kgona go nna a le nosi le barutwa ba gagwe mo kgaolong ya Kaesarea Filipi. Jaanong o ne a batla go itse tota se ba se gopolang ka ene. Ka nako e Jesu o batlile go itse fa barutwa ba itsile thanolo ya tiro ya gagwe.

Jesu o boditse potso pele e e amanang le dikakanyo tsa batho mabapi le tiro ya gagwe. Dikarabo di ne tsa farologana thata go se na e e siameng. Batho bangwe, jaaka Herode, ba gopotse gore Jesu e ne e le Johane Mokolobetsi a tsogile mo losong. Bangwe ba mo gopotse jaaka Elija, yo e nenge le moporofeti wa nonofo le dikgakgamatso. Gape bangwe ba ne ba santse ba mo gopola jaaka moporofeti wa mofuta mongwe, mme ba ne ba sa itse gore e ne e le moporofeti wa mofuta ofe. Jalo potso e e tlhokegang e ne ya bodiwa gore, “Mme lona lwa re ke mang? (temana ya bo 29). E ne e le Petere yo o neng a arabela setlhopha ka boipololo jo bologo a re, o “Keresete.”

TLHALOSO YA BOIPOLELO JWA GA PETERE

Mafoko a ga Petere a ne a le boammaaruri. A ne a le se Jesu o batlileng go se utlwa mo barutweng. Mme se se ne se raya eng? Pele, a re akanyeng se Bajuda ba nako eo ba neng ba se raya fa ba buile ka Mesia gongwe Keresete yo o neng a tshwanetse go tla. Mesia yo o

emetsweng-nako-e telele o ne a solofetswe go busa ka nonofo e kgolo, go tlhoma bogosi jwa Iseraela le go senya merafe yotlhe e mengwe ya lefatshe. O ne a tshwanetse go nna moemedi wa Modimo mo lefatsheng, mme o ne atla dirisa nonofo ya gagwe go dira morafe wa Iseraela morafe wa dikgosi le babusi. Se, lefa go ntse jalo e ne ese tlhaloso ya Bomesia jwa ga Jesu. Jesu o rile o ne a tsile go boga, le go ganwa, go swa, le go tsoga mo baswing (temana ya bo 31). Fa Jesu a kopantse Bomesia jwa gagwe le tshotlego le loso o ne a diragatsa bontlhannngwe jwa Baebele (Pesalema 22 le Jesaya 53). Barutwa le ba ga-bone ba ne ba paletswe ke go tlhaloganya gore dikwalo tse di buile ka Mesia. Jesu o ba itsesitse gore ba ne ba le phoso ka gonne o rile bogosi jwa gagwe e ne ese jwa lefatshe le (Bona Johane 18:36).

MO go Mathaio 16:13-20, boipolelo jwa ga Petere bo latelwa ke polelo e e dirilweng ke Jesu ya gore mo godimo ga lefika le o tla aga phuthego ya gagwe. A re tlhaloganyeng sentle ka ntlha e. Jesu ga a a tlhoma motho ope jaaka tlhogo ya phuthego ya gagwe. Keresete ka sebele ke ene fela tlhogo ya phuthego. Bala gape Bakolosa 1:18. “ke ene tlhogo ya mmele, ebong phuthego, ke ene tshimologo, motsalwa pele go tswa mo baswing, gore mo dilong tsotlhe ene a bone boemo jo bo kwa pele le Baefesia 5:23 . . . “Gonne monna ke tlhogo ya mosadi, jaaka Keresete le ene e le tlhogo ya phuthego, ka e bile e le ene mmoloki wa mmele ka esi.” Jesu o ne a re o tla aga phuthego ya gagwe mo godimo ga boipolelo jwa mofuta o, gore ke Keresete, Motlo diwa wa Mdimmo. Phuthego e diriwa ka batho ba ba amogetseng Jesu Keresete jaaka Morena le Mmoloki wa bone mme ba tsetswe Seša mo moweng ka boikwatlhao le ka tumelo.

THALOSO YA TIRO YA GA JESU *Mareko 8:31-33*

Temana ya bo 31 e tla mo go rona jaaka polelo e e boletsweng ke Jesu ka se o se itsileng gore se tloga se mo diragalela. Mo go yone yotlhe o ne a ranola tlhaloso ya tiro ya gagwe mo lefatsheng. Jesu o rile o tsile go batla le go boloka se se latlhegileng (Luke 19:10), le go ntsha botshelo jwa gagwe jaaka thekololo ya bontsi jwa batho. (Mathaio 20:28). Paulo wa Maoposetoloi mo dingwageng tse di latelang o okeditse ka dikgopolo tsa gagwe tse di tlhotlhelesegileng mo tlhalosong ya Bomesia Jwa ga Jesu. I rile, Modimo o ne o le mo go Keresete, O itetlantse le lefatshe. “(2 Bakorintha 5:19). Gape mo go Ditiro 20:28, o re bolelela gore e ne e le thulaganyo ya Modimo go tlhoma phuthego ka setlhabelo sa loso lwa ga Keresete. Mo kgolaganong E Kgologolo yotlhe, go simolola ka Genesis 3:15, ditsholofetso tsa Mogolodi di ne di dirilwe ke Modimo. Tsela ya

kgololo e e ne ya phepafadiwa gangwe le gape. Isaia, mo kgaolong ya bo 53, o re bolelela gore ‘yo o tlang yo’ o tla rwala pelodibotlhoko tsa rona a sikara mafutsana a rona, mme ka dingalo tsa gagwe re tla fodiwa Isaia 53:4,5).

TSELA YA BORUTWA *Moreko 8:34-37*

Jesu gape o boletse gore tsela ya sefapaano e ne e le tsela ya gagwe mme gape ke tsela ya botlhe ba ba mo setseng morago. O ne a batla go re swela rotlhe. Rona le rona re tshwanetse go eletsa go swa ka ntlha ya Morena wa rona le ka ntlha ya Mafoko a a molemo. Jesu o godisitse boammaaruri jo ka dipolelo di le tharo. Lwa-ntlha, o rile mongwe yo o le kang go ipoloka o tla palelwa. Ga go na ditiro, ga go na mesepele, ga go na dithulaganyo tsa thapelo tse di ka tlisang poloko mo go rona. Jesu o re go diretse. Re tlhoka fela go ikwatlhaya le go mo amogela. Paulo le ene o buile mabapi le kgololo fa a rile, “Gonne lo ntse lo bolokilwe ka tshegofatso ya Modimo ka tumelo, mme le gone go sa tswe mo go lona, mme ke neo ya Modimo, – go sa tswe mo ditirong, gore go se nne motho ope yo o tla ipelafatsang.” (Baefesia 2:8,9) Lwa-bobedi, Jesu o rile mongwe yo o neelang Modimo botshelo jwa gagwe ka ene ruri o tla bo bolokela botshelo jo bosakhurleng. Se se raya gore fa mongwe a ineela Keresete ga a latlhegelwa ke botshelo jwa gagwe mme bogolo o amogetse jo boša jwa tlhomamo jo bosafeleng mo go Keresete. Lwa-boraro, Jesu o feleletsatsela e ya botshelo ka go re bonno jwa mowa wa motho mongwe le mongwe bo tlhokega bogolo thata go feta dilo tsotlhe tsa selefatshe. Jesu fa o baya boithophelo mo go mongwe wa rona gompieno. Fa re tshwanetse go atlega mo go amogeleng dikhumo tsotlhe tse di mo lefatsheng, re tlaabo re santse re le ba re latlhegetsweng fa re fositse go amogela Keresete jaaka Mmoloki wa rona. Jesu jalo o boditse potso e, “motho o ka ntsha eng mo boemong jwa botshelo jwa gagwe.” Ga go na katlego mo tlhakoreng lwa rona e e ka rekololang mowa mo moleteng. Keresete a le nosi o ka boloka le go tshegetsatsa mewa ya batho.

GO IPOLELA KERESETE *Mareko 8:38*

Mo temaneng ya bofelo ya kgaolo e, Jesu o re akareditse rotlhe. O rile re seka ra mo tlhabelwa ke ditlhong mo lefatsheng eseng jalo o tla re tlhabelwa ke ditlhong fa pele ga Rara wa Legodimo. Se se raya gore re tshwanetse go rata go tshela jaaka Mokeresete ka ntlha ya ga Keresete gongwe le gongwe kwa re teng le mo go sengwe le sengwe se re se dirang. Go ipolola Keresete fa pele ga batho ga go reye fela gore

re tla bua leina la gagwe re sena ditlhong mo go supeleng ba bangwe, mme gore matshele a rona a tla tswelela go nna tshupo e e nonofileng mo boammaaruring jwa ga Keresete mo dipelong tsa rona. Kafa ke se kang ka boifa ka gone go lo bolelela sengwe le sengwe se se molemo, ke ruta mo ponong le ka go nna ke tsamaya le matlo, ke supetsa Bajuda le Bagerika tlhabologelo Modimong, le tumelo mo go Morena wa rona Jesu Keresete. Ditiro 20:20, 21.

Jaanong ka o ithutile dithuto tsotlhe tsa sephatlo se sa ntlha sa Efangele ya ga Mareko, Ke batla gore o ele-tlhoko dinnete dingwe tse di tlhokegang thata tse re di ithutileng. Pele, fa motho a tshwanetse go amogela poloko o tshwanetse go eletse boikwathao jo bo tlhomameng (Mareko 1:15). Se se raya gore o tshwanetse go eletsa go dumela dibe tsa gago mme o hutsafale ka ntlha ya tsone mme jalo o eletse go tlogel a dibe tsa gago go latela Keresete. Se se latelang, go na le ntlha ya tumelo gongwe ya go dumela mo go Keresete. Se se raya gore o tshwanetse go dumela gore Jesu Keresete ke morwa Modimo. Ke gore, o ne a feta motho yo o tshelang mo lefatsheng; Tota Modimo o ne o tshela mo go Keresete (Johane 1:14)

Jaanong, fa o dumela dilo tse, o ipaakantse go ikanya Jesu Keresete jaaka Mmoloki le Morena wa gago, le go mo amogela mo pelong ya gago. Johane 1:12-13 O re bolelela gore re dire se jang.

Boitemogolo jo bo bidiwang “go tsalwa seša “Ke yone tsela fela e o ka bolokwang ka yone. Bala mafoko a ga Jesu a a raya Nikodemo mo go Johane 3-3 Modimo o buile ka molomo wa ga Paulo mo ditemaneng tse di kwadilweng mo go Ditiro 20. Paulo ga a a fitlha sepe se se tlhokilweng ke ba o ba reretseng. O ne a ba reretse mabapi le dilo tsotlhe tse di tlhokegang mo polokong ya bone, ke gore, Boikwathao mo Modimong le tumelo mo go Morena wa rona Jesu Keresete. Jaanong, fa o dirile dilo tse di fa godimo ka bopelo-phepa jwa gago, o tshwanetse go rata go ipolela Jesu mo phatlalatseng gongwe mo pontsheng jaaka re buile mo thutong ya rona ya bofelo. Jesu a re fa re mo tlhabelwa ke ditlhong, o tla re tlhabelwa ke ditlhong. Jaanong o ka supa gore ga o tlhabisiswe ditlhong ke Jesu le gore o batla go mo amogela jaaka Mmoloki le Morena wa gago ka go tlatsa le go kwala leina la gago mo pampiring e e kwa bofelong jwa thuto e, A Modimo o go etelepele go ya kwa polokong mo go Keresete ka Mowa O O Boitshupo O O tla dirang mo pelong ya gago.

**TLHOMAMISA GORE O BADILE DITEMANA
TSE TSA BAIBELE**

Mareko 8:27-38

Baifesia 5:23

Genesisise 3:15

Pesalema 22

Luke 19:10

Baefesia 2:8-9

Isaia 53

Mathaio 20:28

Ditiro 20:20-21

Mathaio 16:13-20

2 Bakorintha 5:19

Mareko 1:15

Bakolosa 1:18

Ditiro 20:28

Johane 1:12-14

Johane 3:3

**FA GO ITHUTA GA GAGO GA LOKWALO LO GO GO
THUSITSE GO IKANYA JESU KERESETE JAAKA MORENA
WA GAGO LE MMOLOKI RE BATLA GO ITSE KAGA GONE.
TLATSA PAMPURI MME O E ROMELE KWA GO RONA.**

Nna, _____, Ke ikwatlhaetse
dibe tsa me mme ke ikantse Jesu Keresete go nna Mmoloki wa me. Ke
mo amogetse mo pelong ya me, Ke dumela gore ke ene Modimo fela
wa boammaaruri, le o o nang nonofo go mpoloka.